

那文毅公奏議

那文毅公二任直隸總督奏議卷七十目錄

卷七十

分讞諸獄

附酌改京格杖徒各案爲題
遣犯議請復州縣自理詞訟仍歸道府
稽查舊制留養人犯分別距省遠近提
審委審事

那文毅公二任直隸總督奏議卷七十

上海市歷史文
獻圖書館藏

男容安恭輯

分讞諸獄

附酌改京控杖徒各案爲題 疏通新疆
遣犯 議請復州縣自理詞訟仍歸道府
稽查舊制 留養人犯分別距省遠近提
審委審事

道光五年十二月初二日

奏爲東省員弁越境妄拏致釀人命現在委員前往

查辦事竊據東明縣知縣張良志稟報十一月十

一日夜縣屬孫花屯貢生李增書民人李如李尙

玉等家忽被山東文武員弁兵役百餘人執持鳥

銃混行入室抄搶什物並將李增書之母李祁氏

等捆毆又將地窖內之李庚扎傷身死當卽前往
勘明被搶情形並驗明李庚實係被扎身死訊據
該貢生李增書等供稱查係荷澤縣文武官兵訪
拏賊匪錯認門戶致被擾害等語正在備文通報
間接准山東荷澤縣移稱該縣典史龐光淳曹州
營都司慶齡守備崔恒達荷澤汛千總李紹程等
帶領兵役會拏賊犯李二歪因該犯先已逃逸誤
入該貢生等家搜拏以致李庚自戕肚腹移會查
辦等情稟報前來臣接聞之下不勝駭異查荷澤
縣來文李二歪不過尋常賊匪並非緊要重犯該

員弁等既不查明實在踪跡又不知會本籍地方官輒帶兵役多人越境妄拏以致肆行擾害致傷人命實屬任意妄爲且李庚業據東明縣驗係被扎身死而菏澤縣尙稱自戕尤屬大相逕庭顯係飾詞迴護亟應徹底查究臣隨卽飛咨山東撫臣武隆阿先將妄拏員弁查明奏叅一面檄委大名府知府福敬前往東明菏澤兩縣確查實在情形備細稟覆並卽飭該府知會東省將應訊員弁兵役卷宗一併押解來直以便提同屍親人等委員嚴審究辦仍飭東明縣緝拏李二歪務獲解省歸

案質訊容候審明定擬另行具奏謹

奏奉

硃批已有旨諭矣

道光六年六月二十七日

奏爲委員會審東省兵役越境拏人釀命重案現經
究訊明確仍歸東省分別擬辦恭摺具

奏事竊

臣於上年冬間接據東明縣知縣張良志稟

報十一月十一日夜突有山東文武員弁帶領兵
役百餘人執持鎗械於縣屬孫花屯貢生李增書
等家緝拏賊匪混行入室搶去衣物將地窖內之

李庚扎傷身死當經該縣前往查勘情形並驗明
李庚實係被扎身死旋准山東荷澤縣移稱該縣
典史龐光淳會同營員帶領兵役因拏賊犯李二
歪誤入貢生李增書等家搜緝以致李庚自戕肚
腹身死並解到兇刀移會查辦復經該縣將兇刀
比對原驗傷痕均不相符填圖錄供通報核辦臣
因越境拏人釀命案關重大且自戕被扎尤屬兩
相逕庭卽一面咨會山東撫臣查辦一面據實具
奏旋經該撫臣武隆阿亦查明越境拏人之文武
員弁叅奏奉

旨飭交武隆阿嚴審究辦

臣

當卽檄飭東明縣將應訊

人卷解交該省並委員查明滋事釀命情形一併

移咨該撫

臣

查辦在案嗣經東省派委道府大員

覆驗李庚屍傷輕重七處與東明縣原驗傷痕部

位相符惟堅稱實係自戕並非被扎質之屍親兵

役各執一詞復經山東撫

臣

武隆阿奏明飭委臬

司梁章鉅會同直隸派委大員覆加審究旋因該

臬司另有審辦要案不克前往又經撫

臣

武隆阿

改委兗沂道楊翼武

臣

亦派委通永道李德立帶

同東明縣張良志等前往曹州會同審辦去後茲

據該道等稟稱遵卽調齊卷宗提集人証督同直
束兩省各委員連日悉心研鞫辨供詞之虛實驗
兇器之真僞因查原呈之李庚自戕兇刀一把刃
寬六分背濶一分如用此刀直扎透內則傷口長
寬必與刀刃分寸吻合今核屍圖填註肚腹腸出
兩傷左長一寸右長九分俱寬四分傷仗迥不相
符且二傷俱係上尖下圓直長相並隨調驗荷澤
縣起獲兵役各器械逐件比對圖註傷痕內有二
齒手鈎兩把係荷澤縣差役張得與馬得山分執
之物當令該役等辨認據馬得山指出原執鐵鈎

一把中寬六分兩鈎抱內核對肚腹腸出兩傷分寸適相符合其張得所執鐵鈎中隔較寬比傷不符隨向馬得山逐細根究始據供稱道光五年十一月十一日夜本縣龐典史派伊隨同捕頭營兵前赴東明縣緝拏賊匪李二歪五更時分一同走到孫花屯李二歪門首踢門進內將李二歪之弟李四拉出隨聞營兵嚷說地窖有人藏匿伊與兵役圍住卽將先後走出之劉見禮韓來等拴住復用火亮照看見有一人披衣蹲在炕上疑是李二歪卽將地窖上蓋秫秸拆開一窟營兵韓法貴先

用長杆撓鈎搭住那人髮辮那人用左手向上扳
護捕役李興泰乘勢將其左胳膊振住營兵孫繼
庭用撓鈎搭其右胳膊裏一下聶西榮用撓鈎搭
其脊背一下侯得山用撓鈎搭其胸膛兩下伊見
那人露出半截身子卽用左手揪其右胳膊往上
一提那人身往下掙伊用右手所執二齒鐵鈎在
其肚上一搭本欲鈎住褲帶不料手勢過重誤鈎
那人肚腹提拉出外見已流出腸子卽囑李興泰
曹得扶到東邊地上找尋雞隻撕皮護傷時將黎
明伊跳下地簪查尋賊賊見炕上祇有小刀一把

伊卽拏出適李興泰尋得雞隻卽用小刀宰割雞皮貼護見刀上污有雞血起意捏稱那人用刀自戕當將小刀交給捕頭趙建問明受傷人名叫李庚回明典史信以爲實旋聞李庚因傷身死央懇李興泰張得等隱瞞未曾說出並無挾嫌有心致死別情等語隨質之同場共覩之捕役李興泰張得等所供無異並訊據同用撓鈎搭傷李庚脊背肱肱等處之營兵韓法貴聶西榮等亦各供認不諱是李庚實係馬得山用鈎鈎傷身死並非自戕現已審究明確稟報核辦前來

臣

查此案前據東

明縣原驗具報李庚係因被扎身死而東省委員
覆驗則堅稱係屬自戕臣屢據東明縣具稟情形
詳加體察如果李庚當日實係自萌短見其肚腹
要害處所一傷透膜腸出當已立時昏暈何能復
扎重傷而適又直長相並分寸相同之理兼之肚
腹尚有輕傷三處更非自行試割之傷其脊背胸
腋尤非自戕之所能及且卽據同寤睡宿之韓來
供稱曾見李庚在炕解開衣扣右手執刀聲稱不
愿打荷澤縣官司等語查當日兵役圍拏之時正
值五更時分窖中並無燈亮黑暗之中焉能目擊

李庚解扣執刀情狀况夫事起倉猝韓來尙不知
何處差役拏人李庚又何由知係蒔澤兵役輒爾
揚言及此再查李庚雖曾犯竊有案並無重罪且
非蒔澤縣指拏之犯又何致遽行輟生傷仗旣多
不符情節又多疑竇節經臣與武隆阿往返查詢
必須逐細研求方不致稍有枉縱而該撫臣武隆
阿亦以自戕被扎迥涉兩歧恐覆驗委員或有迴
護同官故習洎弭情事復經奏明兩省各派大員
再行會審始得詳辨兇器究出真情非惟正兇馬
得山供吐如繪卽質之同場兵役所供無不一一

吻合復以兇器比對圖註屍傷分寸毫釐不爽實屬傷仗相符供証確鑿其爲李庚實係被扎致死毫無疑義案已派員會同訊明白應遵照原奉諭旨仍歸東省分別定擬另行奏結謹

奏奉

硃批能如此盡心鞠訊各得真情可謂賢能之吏矣另有諭旨

道光六年六月三十日奉

上諭那彥成奏東省兵役越境拏賊釀命委員會審明確一摺前據武隆阿叅奏都司慶齡等擅帶兵役越

境前赴東明縣拏賊釀命當經降旨將該弁等革職
交該撫嚴審並著那彥成確查實情移咨究辦茲據
該督奏稱東明縣原驗被扎身死之李庚東省委員
覆驗堅稱係屬自戕傷仗不符案多疑竇復經兩省
各派大員會審詳辨兇器盡心鞫訊李庚實係被扎
身死案情既已訊明著遵前旨卽交武隆阿分別定
擬具奏

道光六年三月二十四日

奏爲知縣稟算交代屢結屢翻請

旨分別拏問解任提省徹底確查事竊照直隸清釐各

屬未結交代查出續虧立限追繳定案業已數年詎有原任寧河縣知縣傅德臨忽以接任知縣俞諒造僞捏虧冒恩肥己稟請奏辦稟內臚列款口繁多總以該員寧河縣任內交代長銀四千二百餘兩經俞諒捏造僞冊轉致虧銀四千二百餘兩朦詐達部等情隨經藩司屠之中檢查寧河縣歷任交代卷宗傅德臨前在寧河縣任內於嘉慶二十五年因盜案詳報疎漏革任署任候補知縣何繼志查報該革員虧短倉庫各款傅德臨以所報款數不符稟經前藩司陸言委員會算適值何繼

志仰事接任知縣俞諒覆加核算該革員虧短銀四千二百九十餘兩造冊詳報定案於道光三年

經前督臣顏檢彙

奏著追在案旋據該革員以欸目不實稟請覆算又經藩司屠之中飭委陞任清苑縣知縣白明義等會同核算以原算未清之數爲準聯銜詳覆後又據該革員以核算不公稟請再算復經該司屠之中飭委前任天津府同知張範東等秉公核算仍照原欸議覆該革員不肯輸服復又飭委保定府知府李象鵬等再行會算尙未飭調俞諒來省該

革員又以俞諒所造前後係屬兩冊委員遵以核
算之冊係其偽造並稱如果實係虧短何故代爲
議刪議攤稟請奏辦查前次清苑縣白明義等會
算之時因有

恩免捐款議請刪除迨張範東等覆加核算又因該革
員業已無官無力完繳議將餘銀由後任接攤以
期

帑歸有著乃該革員率混前後欸目總謂有盈無絀
轉執該委員等議刪議攤爲無虧確據實稟不休
甚至竟敢直請

奏辦從前直省清查未結交代一百餘案若人人效
尤尙復成何事體現據藩司屠之中署臬司李德
立會詳請

奏叅辦前來相應請

旨將原任寧河縣知縣傅德臨先行拏問以便飭調該
縣全案卷宗徹底根查細核該革員虧短確數照
例嚴追治罪至俞諒現陞通州知州既據傅德臨
稟稱捏造僞冊亦應請

旨解任質訊如果實有僞造情事亦卽從嚴叅辦以飭
官常而清

帑項謹

奏

道光六年三月二十七日

上諭邗彥成奏知縣稟奠交代屢結屢翻請分別拏問
解任一摺直隸前任寧河縣已革知縣傅德臨虧短
倉庫各欸銀四千二百九十餘兩業經前任總督委
員核算造冊詳報奏明著追茲該革員以欸目不實
核算不公屢結屢翻復稱接任知縣俞諒所造前後
係屬兩冊並執該委員等議刪議攤各欸爲無虧確
據稟請奏辦自應徹底根究傅德臨著先行拏問交

該督提齊全案卷宗細核該革員虧短確數照例嚴追治罪現任通州知州前任寧河縣知縣俞諒旣據傅德臨稟稱該員捏造偽冊著解任質訊如果實有偽造情事著卽嚴行叅辦

道光六年七月十六日

奏爲革員稟揭接任知縣捏造偽冊以長作虧訊明按律定擬事竊據叅革寧河縣知縣傅德臨稟揭接任知縣俞諒造偽捏虧冒恩肥己等情一案

奏奉

上諭那彥成奏知縣稟冀交代屢結屢翻請分別拏問

解任一摺直隸前任寧河縣已革知縣傅德臨虧短倉庫各欸銀四千二百九十餘兩業經前任總督委員核算造冊詳報奏明著追茲該革員以欸目不實核算不公屢結屢翻復稱接任知縣俞諒所造前後係屬兩冊並執該委員等議刪議攤各欸爲無虧確據稟請奏辦自應徹底根究傅德臨著先行拏問交該督提齊全案卷宗細核該革員虧短確數照例嚴追治罪現任通州知州前任寧河縣知縣俞諒既據傅德臨稟稱該員捏造偽冊著解任質訊如果實有偽造情事著卽嚴行叅辦欽此欽遵隨將已革知縣

傅德臨拏問一面檄調現任通州知州前任寧河縣知縣俞諒並提全案卷宗來省飭司秉公查訊去後茲據審明解勘前來臣親提研鞫緣傅德臨籍隸浙江由進士補授寧河縣知縣於嘉慶二十一年六月到任二十五年因盜案詳報疎漏革職是年三月二十七日卸事後任知縣俞諒於道光元年十二月間到任是年查辦三次清查以後續虧先經署任知縣何繼志籠統造報傅德臨以所報款數不符稟經前任藩司陸言委員會算俞諒接收傅德臨交代連歷前任總計共應交銀一萬

八千八百六十九兩零遵照奏定章程各追各任
及有欸作抵應除銀一萬四千五百六十餘兩傅
德臨名下未清銀四千二百九十九兩五錢四分
一釐立有印摺存據俞諒卽照開歷任各員未清
銀欸分任造冊呈送三年三月間經前任藩司陸
言查對司案核明該縣歷任各員續虧分別應刪
應追計傅德臨未清前項銀兩內除另案查辦差
捐並應刪各欸銀一千三百九十九兩九錢六分
七釐外實應追銀二千八百九十九兩五錢七分
四釐由司彙造欸冊一本先行飭發嗣經前藩司

福綿覆核前冊內有舛錯應行更正另造欸冊報部又照報部之冊另繕一本飭發均經俞諒先後照追在案詎傅德臨以前後兩冊所開應追銀數雖屬相同而與原報未清數目多寡懸殊心疑俞諒開報不實屢次具稟經現任藩司屠之申飭委前任清苑縣知縣白明義天津府同知張範東會算查明傅德臨應追銀兩先已完解司庫銀八百四十四兩五錢九分九釐又應刪除免追閒欸並劃抵銀一千一百三十五兩四錢二分一釐下短銀九百一十九兩五錢五分四釐議歸後任分攤

詳經咨准部覆轉行飭知而傅德臨懷疑莫釋憶
及未算交代之先有移交接任知縣張廷儀轉解
銀兩未經扣除交欸又因差捐等項旣准刪除該
革員交代係統連前任核計凡有應刪之欸似可
統歸該革員劃算前後兩冊或係俞諒偽造以長
作虧遂揭俞諒造僞捏虧冒恩肥已等詞稟經藩
司屠之申會同前署臬司李德立詳請

奏叅審辦訊明如傅德臨所控移交現銀未經扣除
交欸一節查該縣交代案內凡有應交各欸及移
交銀兩均係一交一抵至續虧案內完繳銀兩亦

於應追冊內分別收除其應豁應刪各款早經前
司核定各歸各任剔除以昭公允所發兩冊俱用
司印俞諒照抄移追並非偽造其爲不知查辦章
程似屬可信覆加究詰據該革員堅供委非有心
誣執亦無挾制圖詐情事實係懷疑屢稟等語矢
口不移案無遁飾查傳德臨名下應追續虧銀兩
除已完繳並刪除開款劃抵之外尚有未完銀九
百一十九兩五錢五分四釐前據委員議歸後二
分攤雖經咨部覆准尙未據攤解清款今該革員
置身事外猶不知足反執議刪議攤砌詞翻控自

未便將未完銀兩仍令俞諒及後任分攤轉滋藉口應卽欽遵

諭旨照例嚴追治罪惟該革員未完之款前據委員查明係屬外結捐襍並非正項錢糧侵盜入已應照挪移問擬已革知縣傅德臨合依挪移庫銀五千兩以下者仍照律擬襍犯流總徒四年例應總徒四年勒限一年追完如再狡執逾限不完卽從重加發新疆當差以示懲儆通州知州俞諒訊無造僞捏虧情事應免置議飭令回任供職全案供招

咨部謹

奏奉

硃批刑部議奏

道光六年六月十三日

奏爲遵

旨嚴審定擬具奏事竊照前據新雄營都司李士剛等
訪獲新城縣民胡倚角等立會治病斂錢一案經
臣奏奉

上諭那彥成奏訪獲藉治病爲由斂錢惑衆各犯一摺
邪教斂錢惑衆最爲風俗人心之害該犯胡倚角卽
胡之機約同張茂等立會治病據供係得自容城縣

教匪張儉傳說有犄角馬匹名目並學舞刀扎針等
邪術治病是否張儉自行創立會名抑得自他人傳
授必須將該犯嚴拏到案確切根究其現獲匪犯胡
犄角等是否係甫經立教初次治病抑尚有傳徒煽
惑之事亦應徹底究訊以絕根株著該督逐一嚴切
審訊務得確情飭屬將首惡張儉及各逸犯嚴拏務
獲訊明定擬具奏並一面出示剴切曉諭勿任愚民
爲其所惑固不可稍事寬縱亦不可累及無辜也欽
此當卽欽遵

諭旨出示剴切曉諭一面行司飭提犯証並嚴緝逸犯

務獲旋據新城縣將犯証胡犄角等解省并據容
城縣知縣何志清將張儉拏獲解到當經飭發保
定府嚴切審辦茲據該府李象鵬督同委員等審
明擬議由司審解前來臣親提研鞫緣張儉馮泳
太卽劉保張呈兒劉卓胡文均籍隸容城縣胡犄
角卽胡碌兒張茂張一兒鄧辰兒張謙均籍隸新
城縣張儉等所立祖師會名目係由河南朱仙鎮
傳至新安縣漾堤口由漾堤口傳至容城縣馬家
莊由馬家莊傳至胡村東祖師堂山東祖師堂傳
至西祖師堂由西祖師堂傳至薛家莊由薛家莊

傳至新城縣東馬營村起自何年何人創立所稱
祖師究竟有無其人無從查考其會向係給人治
病會內有香頭馬匹名目香頭不過隨同幫忙馬
匹卽許給祖師當徒弟所習之事係燒香上表低
頭灣腰將兩手搖擺隨勢倒在地上聲音祖師附
體卽須脫卸衣服光赤上身第一要耍劍刀一手
將刀柄執住刀刃放在肚腹一手用刀背狠力向
碰祇須刀柄執牢不致傷損又要會耍腰刀兩手
各執一刀左手之刀砍右膀右手之刀砍左膀又
耍扎針或從左腮腠穿入右腮腠出來或從右腮

腴穿入左腮腴出來均係假裝騙人並非真砍真
扎又要打鞭凡是妖魔皆畏鞭聲又要記些偏方
可以治病如治瘋病剪一紙人用病人頭髮一縷
繫在紙人身上用火燒化稱係送邪畫符一紙貼
在病人家門外稱係能使邪祟不敢再來此事不
過騙錢卽父母妻子亦未實告康熙年間不記年
月張儉故祖張思敬在日見胡村之祖師會給人
治病頗有靈驗起意在於本村亦立此會因祖
師脾須向別處偷竊方有靈應卽赴胡村祖師堂
竊得脾位蓋造廟宇裝塑泥像將脾伏奉治病歛

錢嗣張思敬病故張儉故父張瑞宗接續做會嘉
慶二十年間張瑞宗故後張儉起意接手卽將廟
宇修理完固當總會頭維時會內僅止已故之張
堪張名宗現獲之胡文業經改悔投首之劉半串
兒四人劉半串兒係乾隆三十八年入會許當馬
匹並未隨人學習胡文係嘉慶十五年間聽從入
會隨已故之容城縣胡村人楊起學習旋於嘉慶
二十五暨道光二五等年馮泳太張呈兒劉卓亦
先後聽從入會劉卓並未隨人學習亦未給人治
病馮泳太隨已故之張名宗學習張呈兒隨已故

之張堪學習均係尋常稱呼並無師徒名分亦未
轉傳他人惟與張儉時常給人治病不記人名次
數所得錢文亦不記數至馬家莊祖師堂馬匹劉
文係乾隆四十七年入會胡村西祖師堂馬匹段
套兒係乾隆四十八年入會均未隨入學習此容
城縣薛家莊胡村馬家莊等處民人張儉等立會
治病及先後入會之原委也道光五年十月間胡
犄角因見同村杜文場之妻生產不下又同村人
高煥染患噎隔病症均係容城縣薛家莊祖師會
治好起意在於本村亦立此會可以治病歛錢卽

向已獲之張茂商允適有並未入會之容城縣薛家莊人任玉赴新城探親與胡倚角張茂會遇胡倚角告知前情任玉卽以聞得祖師牌位須向別處偷竊方有靈應之言向告旋各走散十月十六日胡倚角卽邀同張茂赴薛家莊祖師堂竊得牌位十四個隨向同村人張謙借得木桿席片搭起棚座將牌供奉令張謙當香頭經營錢文賬目旋有已獲之同村人鄧辰兒張一兒因母患病前往燒香胡倚角勸令入會鄧辰兒等應允遂各許當馬匹並未隨人學習又有孫起林胡升兒吳春張

太劉呈兒吳鶴齡鄧幅興鄧良兒王大嘴或因父母或因已身及兄弟妻子染患病症先後往令胡倚角醫治各給京錢六七千不等其陸續得過京錢五十五千有零張謙因無處存放免允素識之同村人孫昆山代爲收存嗣經張謙買磚一千五百塊餘錢同磚仍存孫昆山家以作蓋造祖師堂之用此新城縣東馬營村人胡倚角起意立會治病歛錢及張茂等聽從入會之實在情形也道光六年二月十三日定興縣北兆村人李清泰因伊父李連染患瘋病往邀胡倚角等前往醫治胡倚

角因從未治過瘋病轉邀張儉馮泳泰張呈兒同往幫治又因向來治病不能寫字僅報藥名令病家自行開寫慮恐李泳泰家不知藥名無人能寫邀允素識之同村人范玉章同往開方劉卓胡文亦與之偕往旋經新雄營都司李士剛訪聞稟經臣飭委署正定府同知羅秉寅前往會拏時新城縣知縣奚澄定與縣知縣朱文奎亦訪有此事會同協捕容城縣知縣何志清因奉委辦道公出途次訪聞亦卽飛飭典史分別查拏時張儉聞知逃往各處躲避適劉半串兒先期自外探親回歸與

香頭竊岳和及求神治病之人思及此事究非正道而胡村馬家莊之馬匹香頭人等亦各悔悟各將祖師堂屋宇拆毀泥像打壞出具切結同所用腰刀等物赴縣投首經代行典史代爲接收迨該縣回署親赴各莊查勘拆毀屬實稟經批准免究造冊登記嗣經委員會同各地方官將胡犄角等拏獲棚座拆毀搜查各犯家內並無經卷圖像及違禁器物訊取大概供情經臣奏奉

諭旨嚴審定擬當卽行提犯卷來省飭委保定府審辦因究出胡犄角等係隨劉半串兒等學習并究明

此之要一在言其理之

劉半串兒等傳案造具投首清冊申解而張儉逃
後日則求乞夜宿空廟並無一定住址至四月初
八日回家探信卽被容城縣拏獲解省屢審供晰
前情不諱嚴詰不移案無遁飾查例載各項教會
名目並無傳習咒語其雖未傳徒或曾供奉飄高
老祖及收藏經卷者俱發邊遠充軍又律載奉

制書有所施行而故違者杖一百又不應爲而爲事
理重者杖八十各等語此案張儉明知祖師會治
病歛錢事屬不經乃因伊父故後起意接手修理
廟宇當總會頭胡犄角因圖歛錢文亦起意倣效

立會治病均屬不法雖未供有飄高老祖及收藏經卷情事第供奉祖師牌位卽與供有飄高老祖無異且該犯等膽敢在於

畿輔重地一則接充會頭一則自行立會藉治病爲由歛錢惑衆尤爲可惡自應按例加重問擬張儉胡犄角均合依各項教會名目並無傳習咒語雖未傳徒或曾供奉飄高老祖及收藏經卷者均於發邊遠充軍例上加重改發新疆以示懲儆馮泳泰張呈兒張茂張一兒鄧辰兒劉卓胡文張謙聽從入會應於胡犄角等軍罪上減一等各杖一百

徒三年與胡犄角等至配所各折責四十板孫起
林胡升兒吳春張泰劉呈兒吳鶴齡鄧幅興鄧良
兒王大嘴密岳和雖訊無入會情事惟免令治病
應與代存錢文之孫崑山并隨往開方之范玉章
及告知牌位須從別處偷竊方有靈應之任玉及
未經到案之杜文場高煥青清李泰均照違

制律杖一百各折責四十板杜文場等飭縣傳案照
擬發落胡八當伊弟胡犄角起意立會之時並不
阻止隨往觀看殊屬不合應照不應重律杖八十
折責三十板劉半串兒劉文段套兒入會治病本

干律擬業已改悔投首准其免罪應與改悔投首
各犯造冊登記如再有犯加等治罪高功等訊無
入會情事應毋庸議起獲牌位鎗刀及賬簿紙人
紙符等物案結銷毀錢文磚塊入官冊報再該犯
等在新城得城二縣地方搭棚修廟聚眾立會該
縣奚澄何志清二員漫無覺察且每年稟報稽查
保甲所稱境內並無匪類竟係具文塞責此案雖
係自行訪聞會同獲犯破案僅可免其斥革仍請
照例議處至從前歷任尖察各員應行議處之處
容另查明咨部辦理再此案係新雄營都司李士

剛首先訪聞稟拏雖從前亦有失察之咎惟能知
地方爲重實心訪緝應請仍交部議敘以示鼓勵
至河南朱仙鎮現在有無此會名目飛咨河南撫
臣飭查核辦並將全案供招咨部謹

奏奉

硃批刑部議奏

道光六年七月十九日

奏爲酌議京控

命審案件查核情罪分別奏咨完結以示區分而免繁
瀆請

有遵行事竊查外省民人赴京呈控案件經都察院步
軍統領各衙門奏奉

諭旨勒交督撫審辦向係將犯証提省飭司督同委員
審擬詳由督撫親審核定專摺

奏覆惟查案情輕重不一罪名大小懸殊當其具控
之初各衙門因虛實未分不得不據詞陳奏仰蒙
皇上慎重庶獄飭交審辦督撫身爲疆吏無不詳細研
求期無枉縱無如內控之人間有健訟之輩或因
畏罪而圖翻原案或因聽唆而妄冀拖延情偽萬
端狡詐百出直隸爲

畿輔重地京控之案甲於他省推原其故良由地近京師往來甚便小民一經涉訟每多刁健之徒從中播弄不遵地方官聽斷輒假捏重情添砌款目紛紛赴京呈控迨經部院各衙門具

奏遞回審明非懷疑妄控卽事出有因核與原案並無出入此等上控之人罪止杖徒並有無罪可科者查向來尋常徒罪例係按季彙咨刑部杖笞卽由本省擬結今京控案內之徒杖人犯與尋常徒杖並無二致若概行專摺具奏罪名毫無關係而連篇累牘不特上瀆

宸聽且不成體制未免所區別臣與蒲臬兩司悉心

酌議似應分別情罪量爲變通應請嗣後直隸省
京控

交審各案除審明實係有關人命罪應擬抵者無論與
原案情節是否相符以及軍流以上案件或與原
案不符或係平空誣告並罪止徒杖有關叅革官
員者仍照向例具奏外其軍流以下案件如與原
案情罪毫無出入不過懷疑妄控事出有因尙非
有心誣告並無關叅革官員罪止徒杖各案俱專
案咨部核擬完結仍咨原奏各衙門知照毋庸逐

案具奏以示區分而免繁瀆謹

奏

道光六年七月二十二日奉

上諭那彥成奏酌議京控交審案件分別奏咨一招直隸民人一經涉訟因來京甚便並有未赴本管道府衙門呈訴輒行京控者與別省情形不同迨審明後罪止杖徒與原案並無出入若概行專摺具奏案牘滋繁嗣後直隸省京控交審各案除實係有關人命及軍流以上或與原案不符或平空誣告並有關係革官員者仍照向例具奏外其軍流以下案件如與

原案毫無出入不過懷疑妄捏事出有因尙非有心誣告並無關係革官員罪止徒杖各案俱著咨部核擬完結仍咨原奏各衙門備查毋庸逐案具奏以示區別而免羈累

道光六年十月十八日

奏爲新疆遣犯壅滯請

旨勅部酌議改發事竊

臣

接准前署陝甘總督

臣

楊遇

春來咨以逆回滋事現在檄調官兵勦辦所有內

地發往新疆人犯暫行停解

臣

已飛飭各屬遵照

在案伏查新疆地方遼濶屯田厥務在在需人是

以定例將內地獲罪人犯擇其情罪較重者發往伊犁烏魯木齊等處分別種地當差爲奴各省遵循辦理歷有年所惟從前人數無幾尙不難於管束今則逐漸加增此輩頑悍性成罔知法紀近聞各省遣犯在伊犁者各分省分爲黨漸知連絡聲氣再久再多深爲可慮況日與口外夷衆襍處其流弊有不可勝言者且查各省距新疆爲遠每一犯發配沿途遞解舟車腳費口糧每一名到戍約記總需銀一百餘兩每年千餘至二千餘不等統計所費不少定例一犯需兩役兩兵護送口食盤

經雖准例有開銷地方尙需賠墊既耗

國家經費而戍所又難於約束轉有日後之患

臣前

在陝甘任內深悉遣犯强悍壅擠情形刻以疏通
爲念旋因奉

命入都未及籌議近聞長齡奏明挑選年力精壯之遣
犯賞給口糧令其從征未必冀其得力正以設法
消彌俾免他虞而現在擬發新疆人犯各省俱紛
紛截留指日軍務完竣仍應照例發配則愈積愈
多吏民裸處久之滋事擾害驅之不可激之生變
何所底止

臣

愚昧慮及莫若變通於先事查辦理

外遣人犯遇有改發者向係發雲貴兩廣極邊烟瘴充軍惟該四省烟瘴州縣本屬無多且有常例應發之犯勢不能再將新疆遣犯一概全行發往溯查發遣新疆條款如強盜免死等犯舊例本係發黑龍江吉林等處給官兵爲奴嗣於嘉慶十七年二十五等年經刑部先後奏明改發新疆人數愈衆伏念治政大體固不可輕易更張而今昔情形不同似當量爲調劑臣與藩臬兩司公同籌議相應請

旨勅下刑部將例內應發新疆等項人犯共七十二條

通融籌畫或留於犯事地方永遠枷號或酌發極邊烟瘴充軍分別纂定條例奏明通行內外衙門一體遵照辦理庶新疆遣犯不虞擁擠而現在各省亦不致有羈留積滯之患謹

奏奉

硃批軍機大臣會同刑部妥議具奏

容安謹案此奏准軍機大臣會同刑部議准得旨依議

道光六年十二月十二日

奏爲審明搶糧各犯定擬具奏事竊查前據大名府

等稟報元城縣民張林翠等扒搶事主林占魁等
家糧食等物並緝獲夥犯李爲等一案臣以元城
縣知縣張金煜平時不能撫綏及至匪徒糾搶糧
石又不能卽獲首犯辦理實形竭蹶廣平縣知縣
明通未將地方受旱情形詳細稟報預爲籌備卽
元城縣糾搶案內亦有該縣民人更未聞曾否查
拏審辦尤爲漫無主見當卽恭摺叅

奏請將張金煜降爲縣丞留直候補明通降爲筆帖
式歸部銓選欽奉

俞允一面劄委大名道李德立前往會同該管道府督

拏首夥各犯張林翠等到案經臣批司提解來省
飭委保定府審辦去後茲據保定府知府金洙審
明擬議由司覆審招解前來臣親提研鞫緣張林
翠李爲高二麻燈高登均籍隸元城縣董七籍隸
廣平縣與已獲之高羣李九賈茄子武聾子姬十
子王根申汶秀高九高明良張汶魁黃洛茂甄同
李二輝張八郭登科許守義未獲之廣平縣人馮
占李朋脖元城縣人張蕘父梁英張武魁李四王
慎言張僧張六梁三小怪梁二平池梁大禿子李
大小張珩張海郭大秋郭二秋張四高林張會連

阿碎黃二禿子張來桂向在廣平縣種地之山東人劉小孫柱並不知籍貫之王九王隨成互相認識道光六年四月初間不記日期許守義與張龔父會遇閒談張龔父聲言年景荒旱糧價昂貴買食甚難許守義答以魏莊李王氏家存有糧食張龔父旋向張林翠告述是月十四日張林翠與董七馮占李朋脖在元城縣辛寨村空廟會遇各道貧苦張林翠憶及李王氏家有糧並探聞附近之辛莊林占魁孫兒莊劉達添安村李汶漢家亦有糧食起意邀董七等赴林占魁等家借糧食用因

恐人數過少不允借給囑令董七各邀數人自十
五日起分日在辛寨村空窰會齊董七馮占李朋
脖應允走散張林翠卽往向李爲高二麻瞪張龔
义告知邀令糾人同往並因高登充當該村鄉長
恐其查知不依免高二麻瞪往央高登匿勿報官
應許事後分潤李爲高二麻瞪張龔义均因乏食
允從高二麻瞪隨往向高登告述前情高登貪利
允爲隱瞞十五日高二麻瞪邀允堂弟高羣李爲
張龔义俱未邀人與張林翠偕至窰上董七亦糾
邀劉小孫柱馮占糾邀賈茄子李朋脖糾邀郭登

科王九王隨成先後走至並有不識姓名十餘人
聞知借糧自行跟隨同往是日午後張林翠董七
李爲高二麻瞪馮占李朋脖各持木桿預備扛擡
糧食高羣攜帶防身鐵尺其餘或帶口袋簍子或
係徒手同夥三十餘人走至辛莊林占魁家門首
時已更餘見林占魁家街門關閉高羣等在外等
候張林翠撥開街門與董七李爲高二麻瞪賈茄
子馮占李朋脖張冀文進院經林占魁與弟林中
魁聽聞開門喝問張林翠等衆稱借糧活命林占
魁等未允張林翠起意令董七等進屋扒搶賈茄

子未敢進內在院接賊張林翠與董七李爲高二
麻瞪馮占李朋脖張冀文走進南北各棚在園內
搶得米食因見櫃內放有錢文亦卽順便攫取董
七並搶得藍布棉褲出院時不識姓名三四人亦
進院入室扒搶張林翠等當與賈茄子將賊搬出
門外交高羣等接收攜賊逃至漫地查點張林翠
以糧食無多當留大錢二千文交高二麻瞪轉給
高登收受高二麻瞪會將扒搶情由向高登告知
下餘糧食錢文張林翠等均分食用藍布棉褲董
七留用十六日張林翠復往邀李爲高二麻瞪張

冀義糾人赴魏莊李王氏家借糧因許守義在李
王氏同村之李倫家管門慮其救護令張冀義往
向許守義告知囑勿攔阻應許事後分糧並稱如
欲阻擋將來定與不依許守義允諾張林翠復自
行添邀胞姪張汶魁張武魁並黃洛茂梁英李四
王慎言張僧張六同至窰上李爲亦轉邀李九梁
三小怪梁二平池梁大禿子李大小高二麻燈轉
邀高羣高九高明良張珩張游郭大秋郭二秋張
冀義轉邀申汶秀張四高林張會連阿碎並自行
跟往之不識姓名十餘人先後至彼輩七因患病

馮占李朋脖俱各因事在家未經同往是日午後
張林翠李爲高二麻瞪張龔義各持木桿高羣仍
帶鐵尺餘或攜帶口袋或係徒手同夥約四十人
走至李王氏家門首時已更餘見李王氏家街門
關閉張林翠等叩門未應卽將後面土牆推倒高
羣等在外等候張林翠李爲高二麻瞪張龔義梁
英進院經李王氏與佃戶許得財廖六聽聞開門
出向喝問張林翠等均稱借糧活命李王氏未允
張林翠卽令李爲等進屋扒搶梁英在院接賊張
林翠與李爲高二麻瞪張龔義走進各屋在園內

搶得糧食因見櫃內放有衣物卽乘便攫取出院時有不識姓名八九人亦進院內許得財廖六因見進院人多上房喊捕致許得財自行碰傷額顱廖六亦碰傷左手背許得財等卽在房上用磚往下擲打內有一人亦用磚回擲俱未中傷不識姓名人亦各進院扒搶張林翠等當與梁英開啟街門攜賊出交高羣等接收一同攜賊逃逸至李爲家查點李爲將搶得銅盆等物自行留用張林翠當留襍糧三斗令高二麻賍張英義分別轉給高登許守義下餘糧食張林翠與李爲等俵分食用

十七日張林翠欲與張蕪義李大小將搶得李王氏家衣物攜赴廣平府質當難以再往劉達添李汶謨家借糧往向董七馮占李朋脖告知囑令自行前往向借如未允只可搶取得有糧食仍須與伊均分並向李爲通知同往李爲當卽邀允李九黃二禿子郭二秋張來桂馮占亦邀允賈茄子武龔子姬十子王根甄同李二輝張八董七李朋脖並未邀人與自行跟往之不識姓名十餘人先後走至窩上是日午後董七李爲馮占李朋脖仍攜木杆餘或攜帶口袋扁担或係徒手同夥約三十

人偕至孫兒莊劉達添家門首時已更餘見劉達添街門關閉賈茄子等在外等候董七撥開街門與李爲瑪占李朋脖進院經劉達添與弟劉添一佃戶岳汶魁聽聞開門喝問董七等均稱借糧活命劉達添等未允董七瑪占李朋脖卽進東屋李爲亦隨同進內在園內搶得糧食復赴廚房攜取米麵出院時不識姓名四五人亦進院入室扒搶董七等當將贓物攜出街上交賈茄子等接收一同攜贓逃逸劉達添與劉添一岳汶魁出街追捕劉添一被落後一人用碎瓦片拒擲致傷額門額

顧右眉岳汶魁亦自在街門上誤碰致傷偏左偏右董七等至馮占家查點俵分食用董七臨行時與馮占李朋脖約定十九日再赴李汶謨家借糧至期董七李朋脖各至窩上張林翠因當贓未回仍未前往馮占邀同武聾子姬十子王根並自行跟往之不識姓名十餘人先後踵至是日午後董七馮占李朋脖仍攜木桿餘或攜帶口袋扁担或係徒手同夥二十餘人偕至安村李汶謨家門首時已更餘見李汶謨家街門關閉武聾子在外等候董七撥開街門與馮占李朋脖進院經李汶

謨聽聞開門喝問董七等均稱借糧活命李汶謨未允董七馮占李朋脖走進東西廂房在國內搶得糧食出院時不識姓名三四人亦進院入室扒搶董七等當將糧食攜出街上交武龔子等接收分攜逃至漫地查點俵分食用張林翠分得劉達添李汶謨家贓物均係馮占收存時張林翠先與張龔父令李大小用車將贓衣載至永年肥鄉等縣當舖質得錢文於二十日回歸馮占未將前贓交給張林翠亦卽歇手將當贓錢文復令高二麻瞪送給高登大錢二千餘錢張林翠與高二麻

張糞父李大小分用事主林占魁等報縣勘訊緝獲首夥各犯張林翠等到案提省審訊各供前情不諱覆詰該犯等委因災荒饑餓糾夥借糧並無預謀強劫誠恐該犯等因逸犯未經全獲避就狡供復隔別嚴詰僉供不移案無遁飾此案逸犯馮占等弋獲無期既據各犯衆供確鑿自應先就現犯擬結查張林翠因年歲被旱起意糾邀輩七等赴林占魁等家借糧不允輒主令進屋扒搶并乘便攫取錢衣等物連日供計扒搶四案雖事主劉達添李汶謨兩案該犯並未同行訊係由其主令

且糾夥持械已在十人以上實屬不法自應以張
林翠爲首問擬張林翠合依饑民扒搶聚至十人
以上執持器械倚強肆掠均照糧船水手之例分
別首從定擬糧船水手夥衆十人以上搶奪爲首
照強盜治罪例擬斬立決該犯於四日之內迭搶
四案情節較重應請

旨將該犯張林翠加擬梟示並將首級解赴犯事地方
懸桿示衆以昭炯戒董七李爲高二麻瞪聽從張
林翠轉糾多人赴林占魁等家借糧不允隨同扒
搶亦屬不法內董七李爲聽糾三次高二麻瞪雖

止二次係與董七等一同進搶俱應照爲從問擬
董七李爲高二麻瞪均合依爲從減一等例於張
林翠斬罪上減一等杖一百流三千里董七與張
林翠等首先商謀定議情節較重應請將董七竇
發烟瘴地方充軍高登身膺鄉長係屬在官人役
祭匪稟究是其專責乃於高二麻瞪告知張林翠
等糾衆借糧並不稟官拏究輒貪利聽囑徇隱事
後明知扒搶情由復敢收受贓糧卽與捕役勾竊
分贓無異自應比例問擬高登應比照捕役勾通
竊賊坐地分贓者改發雲貴兩廣極邊烟瘴地方

充軍例應改發雲貴兩廣極邊烟瘴地方充軍業
已在監病故應毋庸議高羣李九賈茄子武韓子
姬十子王根聽糾借糧二次或在外等候或在院
接贓並未轉行糾人亦未入室幫搶與轉糾夥黨
並隨同搶掠者情稍有間自應酌減問擬高羣李
九賈茄子武韓子姬十子王根均應於董七等流
罪上量減一等杖一百徒三年與董七李爲高二
麻瞪至配所各折責四十板高羣所供親老丁單
飭縣查明取結詳辦申汶秀高九高明良張汶魁
黃洛茂甄同李二輝張八郭登科訊明實因災荒

饑餓聽糾借糧在外等候並未轉糾夥黨亦無預
知扒搶情由且聽糾均只一次旋即慮拏避匿尙
知畏法亦應酌量問擬中汶秀高九高明良張文
魁黃洛茂甄同李二輝張八郭登科均請照不應
重律杖八十各枷號一個月滿日折責三十板許
守義於李王氏家被搶不爲救護訊因被脅所致
惟事後得受贓糧究有不合應照不應重律杖八
十折責三十板已獲之贓給主認領未獲各贓同
當本錢文在於各該犯名下照追分別給主還商
買贓之不識姓名人請免緝究劉添一等傷均平

復亦無庸議逸犯馮占等飭緝獲日另結供招咨
部謹

奏奉

硃批刑部速議具奏

道光六年十二月二十二日

奏爲查明京控案件已未完結起數恭摺具

奏事竊查直隸地方近隸

神京小民赴京具控之案甲於他省必須趕緊審辦

方免守候拖累本年七月間

臣

因查內控各案情

節不一若概行具奏未免無所區別奏請軍流以

下案件如與原案情節毫無出入並無關係革官員罪止徒杖各案俱專案咨部核擬完結以免煩
賁仰邀

俞允在案茲查上年十一月自臣到任起截至現在止
都察院奏交控案十五起步軍統領奏交控案八
起共二十三起內已審結奏覆者十六起專案咨
部完結者三起尙有吳橋縣民楊廷楷一案鉅鹿
縣民袁中倫一案多倫廳民周忠禮等一案深澤
縣民張敬業一案共計四起或因甫經提到人証
飭司委審或因人卷尙未解省現在催提統俟嚴

提到日飭催審訊分別虛實按例問擬由臣親審覆

奏至內控咨案業已據審詳到臣者均經隨時覆核

咨部未據審詳者無多已勒限嚴催迅速審訊詳

辦臣惟有隨時實力催提以期案無留牘民無延

累仰副

聖主清釐獄訟除莠安良之至意謹

奏奉

硃批知道了

道光七年閏五月初四日

奏爲訪獲習教人犯訊取大概供情恭摺具奏事竊

照^臣自到任後通飭各屬實力辦理保甲訪查邪

教務期有犯必懲以正人心而靖邪萌茲據署廣

平府邯鄲縣知縣壽澗章稟稱曾經前任知縣張

翰仙密行交代訪聞該縣西鄉戶村龜台寺內有

匪人聚會燒香習教之事隨即會同營汛帶領兵

役前赴寺內起獲魚鼓剪板道帽衲衣等物搜查

並無經卷圖像符咒及違禁書籍不法字跡先後

拏獲尹祥李士貴等二十九名隔別研審尹祥係

清河縣人先於嘉慶八年間聽從已故之南宮縣

大河莊三官廟道士王太和同赴山東禹城縣王家莊七聖堂菩薩廟內居住學習一炷香如意教李士貴係邯鄲縣戶村民人伊父李如芝在日以跪香治病爲一炷香天爺教李如芝故後李士貴相繼傳習至十八年因滑縣滋事尹祥李士貴卽行中止不敢行教迨道光五年三月間李士貴故智復萌欲興教牟利遣李振山等往邀山東禹城縣習教之馮大坤前來並接尹祥至龜台寺居住李士貴囑令復興一炷香天爺教名目尹祥編造行好修善得以積福消災歌詞並稱如入此教一

生可免災患有病者跪香即可除病令李士貴等傳誦煽惑遂有民人宿登旺等前往跪香治病習教定期做會數次並無謀爲不法情事訊明各犯供出在會習教之人除已獲外尙有十餘名未獲現在按名嚴拏歸案審辦等情稟報前來

臣

查尹

祥李士貴均係十八年以前習教匪徒膽敢復立教名編造歌詞傳習煽惑實屬目無法紀自應從嚴懲辦據供僅止跪香做會並無謀爲不軌殊難憑信卽被惑入教之人亦恐不止此數必須確切根究以免縱漏並飭將已獲各犯解省審辦未獲

各犯嚴密查拏歸案辦理毋使一名漏網謹
奏奉

硃批所辦甚好

道光七年閏五月初七日奉

上諭那彥成奏訪獲習教治病人犯訊取大概供詞一
摺所辦甚好此案尹祥李士貴等均係曾經習教匪
徒歛跡後不知改悔竟敢復萌故智往邀山東禹城
縣教匪馮大坤復興一炷香天爺教名目編造歌詞
希圖煽惑牟利現經該縣先後拏獲習教匪犯二十
九名尙有未獲匪犯十餘名其禹城縣匪徒馮大坤

是否已經獲案必須根究確實按名悉數嚴拏務獲
如馮大坤尙未弋獲卽當知會程含章飭屬一體查
拏歸案辦理固不可使匪徒漏網亦不可任聽胥役
擾累無辜

道光七年八月初十日

奏爲審擬具

奏事竊照邯鄲縣訪獲客民馮大坤等習教傳徒做
會並李士貴等先後在押取保病故一案當將訊
取大槪供情奏奉

諭旨必須徹底根究確實按名悉數嚴拏務獲欽此經

臣檄提犯卷來省並咨准山東撫臣程含章將案

內之馮大坤獲解來直當委保定府知府周壽齡

審明擬議由司覆勘前來臣隨卽親提研鞫緣馮

大坤籍隸山東禹城縣尹祥籍隸直隸清河縣李

士貴籍隸邯鄲縣住居縣屬之戶村該村向有龜

台寺一座馮大坤之祖馮萬思尹祥之師王太和

李士貴之父李如芝曾在寺習一炷香天爺教又

名如意教在院用磚壘起高方約二尺名爲天地

臺逢朔望燒香跪拜口念敬重天地孝順父母及

倚天靠天爲善報天等語稱係可以除病消災馮

萬思傳給族姪馮珍並河南人賈寶玉李如芝傳
給李士貴並同縣人宿登旺均經拜師習教嗣馮
萬思李如芝病故馮珍卽赴齊河縣三教堂賈寶
玉亦赴龜台寺各充道士宿登旺之兄宿登科及
劉萬金郭進寶李士奎因病亦隨李士貴燒香惟
王太和先在南宮縣三官廟僱用尹祥工作因其
常說好話勸人尹祥免令隨口傳授亦相從爲道
士並未授徒行教嘉慶十年間馮大坤因母病往
找馮珍燒香治好遂拜認馮珍爲師與齊河縣人
鄭林鄭紀堂一同習教至十六年間有同教已故

之邯鄲縣人李輜輔劉洛添因賈寶玉在寺病故
遣子李讓訪請馮大坤前往住持馮大坤意欲行
教圖利卽隨同至寺其時宿登旺宿登科均因有
病邀令馮大坤至家燒香宿登旺亦拜認爲師後
因李輜輔等不甚信服馮大坤仍回三教堂復收
齊河縣人高玉兒爲徒馮珍旋卽病故高玉兒乘
機竊物逃跑尹祥於嘉慶八年春間跟同王太和
由三官廟移至禹城縣七聖堂王太和行教令尹
祥拜認爲師王太和病故尹祥卽在廟住持因人
地生疎亦未轉傳嗣赴隣近楊家圈趕集與李士

貴撞遇知爲同教始相認識十八年秋聞該犯等因聞河南滑縣教匪滋事官兵查拏甚緊馮大坤卽回原籍禹城縣與尹祥等均不敢習教此馮大坤尹祥李士貴各自拜師沿習并轉傳宿登旺等聞拏斂跡之原委也至道光五年三月李士貴以事隔多年起意復興前教遂令宿登旺袁本諒與李振山往邀馮大坤如其不允卽邀尹祥至寺經理宿登旺等往與馮大坤相商馮大坤以前次來寺爲李輜輔等所薄此時不便輕許託稱有事不能遠離向宿登旺等同覆宿登旺等卽往邀尹祥

亦因廟內乏人許俟秋後才到宿登旺等歸向李士貴告述而馮大坤雖佯爲辭覆實冀復往邀請至九月底無信遂假以他事爲由前赴寺內探聽維時李士貴已令張景子往接尹祥及與馮大坤相見勉強留住下並未向告馮大坤卽往宿登旺宿登科家囑令照舊習教燒香並有康堤因熟惡眼疾亦邀馮大坤至家燒香拜師適尹祥我得回充道士並未習教之葛本中至廟接手卽起身回清河縣與張景子等撞遇將尹祥接至寺內馮大坤始知李士貴遣請在先尹祥遂以寺內人多不敷

食用向馮大坤用言示意馮大坤知難久留復回
禹城縣因無人信奉並未續收徒衆李士貴卽密
囑尹祥設法興教稱俟日久人多得有佈施錢文
均分使用當在寺內設起天地臺每日燒香跪拜
將勸善各話編就歌詞用魚鼓剪板拍唱勸人修
善李士貴先拜尹祥爲師李振山亦隨同燒香時
有郭治修常存信李承安洛益宿登旺康凝盧添
幅先後赴寺隨同尹祥燒香跪拜偶遇患病痊愈
皆指爲跪香功效郭治修等益加信服均拜尹祥
爲師尹祥與李士貴因人少未能歛錢復起意輪

流做會誘人入教卽派定每月初六在郭治修家
初八在常存信家初九在李承家初十在安洛益
家十一在李士貴家十七在宿登旺家十九在康
凝家二十在盧添幅家各做散會一次二十六日
在寺做總會一次令郭治修等各在已院設立天
地臺惟安洛益因住院窄小借安士奎家設臺做
會屆期各帶米麵或折錢文均往燒香跪拜尹祥
復勸誘將錢米交給值會人做飯共食伊與李士
貴係值會人供應不帶錢米如遇寺內總會亦各
照樣帶往喫有餘剩卽交尹祥留存其時宿登科

郭進寶袁本諒劉萬金李士奎張景子宋言祿常
存仁李祭李三原常拴子常二小常忙子岳思明
郭六子李登貴安士奎安士彥安不喜張存儉李
洛旺張克平李士才劉榮子劉馬武李士安安年
子康發家張克秀張自功郭敬業張存樹張春子
趙國祥郝進義韓勇和郭四功李唱子各因有病
求福或赴散會或赴總會均往隨同燒香並未拜
師內有送給尹祥鞋襪或香錢數文亦有並不致
送因得錢無多李士貴並未分用尹祥亦不記確
數至七年四月間經該署縣壽澗章與前縣張翰

仙先後訪聞張翰仙因已御事酌留家人劉祥等
協緝壽澗章恐該犯等聞風遠颺卽於五月初一
日密至龜台寺將尹祥李承李振山拏獲究出習
教燒香做會情由復於初二日會同營弁各帶兵
役及劉祥等分路查拏並詣寺親加確勘在於各
屋內起獲魚鼓剪板等物並無經卷圖像及不法
書籍字跡並先後拏獲李士貴宿登旺郭治修等
存信康凝盧添幅袁本諒劉萬金李士奎郭進寶
宋言祿宿登科李察李三原張景子李縱雨常存
仁常栓子常二小常忙子岳思明郭六子李登貴

安士奎安士彥安不喜張存儉李洛旺張克平到
案訊供李士貴常存仁旋即病故並據山東禹城
縣將馮大坤獲解來直提犯研鞫據各供晰前情
不諱恐有謀爲不軌及被惑不止此數覆詰不移
案無遁飾查例載軍民人等燒香集徒夜聚曉散
並捏造經咒傳徒歛錢一切左道異端煽惑人民
爲從者改發回城給大小伯克及力能管束之回
子爲奴又律載奉

制書有所施行而故違者杖一百各等語此案馮大
坤等均習一炷香天爺教燒香治病於間禁停止

之後輒敢轉相傳習馮大坤因欲行教圖利往來
兩省先後收宿登旺等爲徒尹祥圖分佈施錢文
聽從李士貴燒香做會編造歌詞並收郭治修等
爲徒李士貴欲圖興教牟利邀令尹祥至寺煽惑
多人並先令宿登科等隨同燒香俱屬不法該犯
等係拜已故馮珍等爲師沿習並非各自倡行自
應按例問擬馮大坤尹祥李士貴三犯均各依軍
民人等燒香集徒夜聚曉散並捏造經咒傳徒歛
錢一切左道異端煽惑人民爲從者改發回城給
大小伯克及力能管束之回子爲奴例應發回城

給大小伯克及力能管束之回子爲奴俱面刺外
遣二字仍遵照新例暫行監禁俟軍務完竣卽行
發遣馮大坤前在東省與鄭林等拜認馮珍爲師
習教多年據稱僅收高玉兒一人爲徒並無另有
惑衆不法情事應請解回山東提同鄭林等究明
如無別故卽照擬監候發配尹祥雖年逾七旬係
習教匪徒不准收贖李士貴業已病故應毋庸議
郭治修李承常存信康凝盧添幅宿登旺六犯聽
從尹祥等燒香習教設臺做會並先後各拜馮大
坤尹祥李士貴爲師亦屬不法均應於馮大坤等

遣罪上減一等杖一百徒三年至配所折責充徒
宿登旺與宿登科雖係一家共犯但宿登科並未
一同做會未便罪坐其兄致滋輕縱康凝年逾七
旬被惑入教情節較輕應請照律收贖李振山宿
登科郭進寶袁本諒劉萬金李士奎張景子宋言
祿常存仁李三原常拴子常二小常忙子岳思明
郭六子李登貴安士魁安士彥安不喜張存儉李
洛旺張克平等二十二犯均因患病邀福隨同燒
香並未拜師做會應請均照違

制律杖一百各折責四十板李振山安士彥張克平

均年逾七旬照律收贖同康凝贖銀一併追取入
官冊報常存仁業已因病身死郭進寶據邯鄲縣
申報病故均毋庸議李察隨同燒香業已罪坐伊
兄李承應照一家共犯之例免其科罪逸犯安洛
莖等飭緝獲日另結該處龜台寺現在據該縣稟
報壘寨毋許再啟容奸所有失察習教傳徒之現
任邯鄲縣知縣壽澗章係自行訪獲應與酌留家
人隨同協緝之前任邯鄲縣知縣張翰仙暨隄關
會卽行緝獲馮大坤解直審辦之山東禹城縣知
縣吳梯應得處分均請邀免並供招圖結咨部謹

奏奉

硃批刑部議奏

道光七年九月十四日

奏爲盤獲捏造諭帖赴知州衙門誑騙之戶部書吏
據實具奏請

旨飭拏同謀各犯發直歸案審辦以懲詐僞事竊查直
隸唐縣民人張朝剛赴都察院呈控定州民人吳
玉山等越境開溝引水灌田一案經都察院奏奉
諭旨交臣審辦當卽飭委藩臬兩司提案來省查訊一
面轉委清河道陶樑督同前任正定府現任保定

府白明義前往勘明新溝並非應行水道擬於山
北另開溝渠因案內糾衆爭毆之犯尙未獲解是
以未經訊結覆奏茲據藩臬兩司會稟稱接據定
州知州黃克昌具稟本年八月二十四日突有兩
人自京來定一名余春帆一名陳殿揚稱係戶部
書吏奉有本部諭帖會同定州唐縣查勘爭溝情
形所投諭帖一紙硃票並未用印該州隨即喚見
據稱向有抱告李琢並帶來部役李瑞在於州屬
潘村等語該州以事涉罕見將來吏款留一面稟
請司示該司等因京控奏咨案件從無部書奉諭

帖出京查辦之例今余春帆所執諭帖旣無印信其爲詐騙無疑必須提省切實究辦卽委員前往定州守提並飭該州密拏抱告李琢部役李瑞一併提省發交保定府訊究去後茲據該府連日研訊據余春帆供稱係大興縣西安南營人在戶部福建司充當帖寫本科經承袁錦江本年七月二十日外不記日期有京城虎坊橋開設成衣舖之伊戚楊廷棟領同定州人李琢等向伊告稱現與唐縣民人爭開溝渠欲在部呈控託伊設法辦理仍開舊溝許給酬謝並付河圖節畧查看伊圖利

應允起意捏造諭帖誑騙隨捏稱須討戶部諭帖
前往會同地方官查勘即可開挖舊溝李琢許給
大錢二千五百千先付大錢二百五十千伊得
受二百千餘存楊廷棟舖中伊遂向中城兵馬司
正指揮衙門書吏伊表叔朱義山及同部貼寫陳
殿揚告知誑騙情由許給錢文囑令朱義山捏造
戶部諭帖一紙上列余春帆陳殿揚之名後列滿
漢堂司官銜名伊自行硃標畫押嗣陳殿揚不肯
同往伊卽僱鄰人劉文貴冒名頂替並令任利瑞
捏名李瑞假稱戶部皂役押解抱告李琢同至定

鬼蜮伎倆甚屬可惡

州伊進見知州投諭卽被款留解省訊辦又據李
琢供稱伊係定州潘村人伊等與唐縣民人爭挖
溝渠雖蒙勘明在於山北勾提村開挖伊恐難經
久仍欲在城子等村復開舊溝商同村人楊豐登
等欲行赴京翻控遂與西潘村張洛澤臺頭村劉
洛端崖下村呂三更各在木村共措銀三百餘兩
並繪河圖一張歷控節畧一紙頃素好之任縣人
任幅濫並姪任利瑞帶領至京轉托京城虎坊橋
開成衣舖之楊廷棟指引往見戶部書吏余春帆
囑其設法辦理仍開舊溝余春帆應允議定送給

大錢二千五百千先付大錢二百五十千余春
帆隨辦出戶部硃票畫押諭帖一紙聲言與同部
書吏陳殿揚前往定州會同地方官查勘卽可開
挖舊溝並令任利瑞假充戶部皂役押伊至州候
訊卽被定州將伊拏獲解省伊實係被余春帆假
冒撞騙各等語訊之陳殿揚卽劉文貴李瑞卽任
利瑞等供詞大畧相同質訊京控遞回審辦之唐
縣原告張朝剛及到案定州被証僉稱李琢如何
向部書余春帆賄囑行求伊等均不知情伊等情
愿遵照前勘在於山北另開溝渠不敢再有翻異

是張朝剛等京控一案業經詣勘明確且於李琢等賄囑一節現訊原被人等均不知情李琢本非此案應質証佐候獲到糾衆爭毆之犯卽可擬結核與余春帆等之得受有事人財以及李琢等之以財行求實判然兩事應卽分案辦理除將余春帆等先行分別羈押一面委員分赴定州等處查拏派費出銀之楊豐登等來省質審並將張朝剛京控一案飭府先行辦理外先將訊出大概供情並余春帆捏造諭帖一紙稟呈前來臣查定州民人李琢與唐縣民人爭控溝渠業經道府勘明乃

不候官斷輒思另開舊溝向楊豐登等指稱打點名色派費得銀赴京托楊廷棟向余春帆賄囑許給大錢二千五百千之多實非安分之徒余春帆

硃

身充戶部書吏輒因李琢等互控溝渠卽起意誣騙與陳殿揚通同串詐該犯先已詐得贓錢並令

硃

朱義山捏造戶部堂官諭帖自爲硃標畫押帶同

硃 硃

李琢赴州投遞不法已極指揮衙門書吏朱義山聽許受財代爲捏造諭帖顯係贓已入手又開設成衣舖之楊廷棟知情說合寄存贓錢是否只有此數且恐余春帆本科經書袁錦江亦有染指情

事恐現訊供詞尙有不實不盡事關部坊書吏舞弊必須提訊根究以成信讞相應據實奏

聞請

旨飭下提督衙門將戶部福建司書吏袁錦江陳殿揚中城正指揮書吏朱義山並虎坊橋開設成衣鋪之楊廷棟一併拏獲發交直省歸案照例審辦謹奏奉

硃批查拏甚好

道光七年九月十六日奉

上諭那彥成奏盤獲捏造諭帖赴知州衙門誑騙之戶

部書吏余春帆等一摺查拏甚好著步軍統領衙門
卽將戶部福建司書吏袁錦江陳煥揚中城指揮衙
門書吏朱義山並開設成衣舖之楊廷棟一併迅速
拏獲不准任其逃匿解交直隸省歸案審辦

容安謹案是年冬間 先公奉

使回疆此案移交護督屠公之申審擬奏結

道光九年九月二十日

奏爲州縣自理詞訟請仍責成道府稽查以符定例
事竊查前署督 臣 松筠議奏清釐案牘覈定功過

章程欽奉

上諭松筠於接署督篆後檢校各府州縣積案酌定章程嚴加考覈著照所請嗣後各州縣將所收呈詞按月詳報已結若干未結若干兩造自請息訟者若干續接呈詞若干逐案聲叙報明該督該司及本管道府查覈分別記功記過以昭勸懲欽此旋又奏請自本年六月初一日起令各州縣將已結未結控案按月具報覈定功過統計三箇月奏聞一次欽奉

硃批立法何難行之維艱務要實力而有恒方可奏績也勉之欽此均經通飭各屬一體欽遵

諭旨實力奉行臣回任後又復嚴飭各屬遵照松筠奏
定章程依限造報現屆三個月彙奏之期據各屬
詳報已結未結各案前來現應飭司覈明功過開
單彙奏惟查民間控案分別情節重輕有例應題
奏者有咨部覈奏者其無關緊要之案詳由院司
批飭謂之外結至若戶婚田土錢債口角細故在
各州縣無日無之瑣細之事謂之自理詞訟定例
設立循環簿籍開具案由責成該管道府廳州稽
查催審按月註銷原以案情有大小而督責有等
差今直隸通省一百四十餘州縣自理詞訟月計

不下數千案積至三月彙奏一次累牘甚至萬有餘件且一有奏定章程各省均照此辦理瑣細繁多不可勝計在臣等督撫彙單具奏事非難辦惟思

聖主日理萬幾原不厭於繁碎若通天下而計每年增十餘萬案牘民間鼠牙雀角細瑣之端事事上瀆宸聰亦於政體未協臣查向例有無孥獲尋常案犯有

無私設班館刑具及奏繳郵符等事向俱年終彙奏現皆改爲彙咨乃於州縣自理詞訟又須按季奏

聞亦覺兩歧至於考察州縣不外舉劾兩端偶因一事之優長記功示獎或以一時之忽畧記過示懲原所以備考覈之資使之知所奮勉向祇飭司存記並不具奏亦不報部聽斷勤明乃州縣分內之事未宜爲功如果因循疲玩卽于嚴叅何止記過若卽以此定爲勸懲形諸奏牘似又於議叙處分之外復添條款於例款亦多紛襍臣與藩臬兩司公同商議題奏咨部及內控上控案件均有一定期限遲延卽于處分毋庸置議嗣後州縣自理詞訟應請仍照定例責成道府廳州嚴查循環簿籍並

欽遵現奉

諭旨將已結未結請息續控案數按季造冊報明臣衙門及藩臬兩司查考仍比較勤惰分別功過歸於年終甄別案內彙總覈辦如有過多功少才不勝任者卽奏明分別降改在州縣同一警惕而辦理較爲得體所有松筠議請三個月具奏一次之處應請停止以省繁文而符體制謹

奏

道光九年九月二十九日奉

上諭邵彥成奏州縣自理詞訟請仍責成道府稽查以

符定例一摺前據松筠奏清釐案牘覈定功過章程
令各州縣將已結未結控案按月具報統計三個月
奏聞一次現據該督奏稱已屆彙奏之期查明各屬
詳報自理詞訟月計不下數千案積至三月累牘甚
至萬有餘件瑣細繁多殊於政體未協至考察州縣
記功記過向祇飭司存記並不具奏亦不報部若卽
以此定爲勸懲形諸奏牘又於議叙處分之外復添
條款實屬紛襍著照所請除題奏咨部及內控上控
案件逾限照例叅處外其各州縣自理詞訟仍照定
例責成道府廳州嚴查循環簿籍將已結未結請息

續控案數按季造冊報明督撫衙門及藩臬兩司查
考仍比較勤惰分別功過歸於年終甄別案內彙總
覈辦如有過多功少才不勝任者奏明分別降改以
符體制所有松筠議請三個月具奏一次之處著卽
停止將此通諭知之

道光九年十二月十五日

奏爲審明開場聚賭被拏糾衆奪犯傷官按例定擬
事竊據深州知州蔣兆璠具稟饒陽縣知縣劉遵
海於本年十月二十四日赴鄉巡查地方行至與
獻縣交界之北岩村查知彼處有開挖地窖藏匿

聚賭之事當卽督役下審擒獲數人被匪夥李青山等聚衆奪犯追至民人王恪懷家將該縣並丁役車夫一併毆傷各犯紛紛逃逸稟經該州馳往勘得北岩村車道東北有地窖一個業已拆毀又勘得村西王洛懷家門窗均有撞損痕跡查驗該縣劉遵海髮辮被揪右額角額顙各有木器一傷又該縣家丁王玉偏右有鐵器傷一處髮辮揪落一縷又快役李得勲右太陽接連右眼胞左手腕左臙服各有木器傷一處李顯青右額角左手腕左臙肘左腳踝右膝蓋右腳腕均有鐵器傷一處

又皂役耿振剛髮辮揪落一結右膝蓋有鐵器傷
一處蘇明山左腳腕有鐵器一傷王魁義左手腕
有繩痕一道車夫韓德功右肩甲有木器傷一處
並提驗該縣劉遵海與家丁王玉所穿皮馬褂均
被撕破等情臣當以地棍挖窖聚賭經官捕拏膽
敢糾衆奪犯致傷官役實屬目無法紀該處爲饒
陽獻縣兩邑交界之所飭司委員會同該二縣上
緊嚴拏務獲首夥各犯解省審辦不得稍有延縱
隨據該縣等將首犯李青山及同往拒捕之劉靠
山賭犯朱清河等先後拏獲同應質人証批解來

省委據保定府張範東督同委員審明擬議由司
覆審解勘前來臣提犯親鞫緣李青山籍隸獻縣
充當山秋村地保與已獲之劉靠山劉俊張疇成
李棠劉小黑李白珩劉次爲劉水張夫有李洛添
劉獻劉蘭盧狗兒李了頭焦純張三劉偶朱青並
未獲之劉二水李國大焦四小焦四李大文王才
宋建德李小河李成兒均相熟識道光九年十月
十四日劉靠山會遇李棠劉二水劉小黑王才宋
建德李小河叙及閒居無處工作起意開賭抽頭
分用李棠等應允言明每人出京錢五千文交劉

靠山收存作本輸贏按股分認慮被官人查拏卽在獻縣山秋村與饒陽縣北岩村連界地方僱人挖成地窖以便糾人藏匿聚賭不致被拏劉靠山買得寶盒一個又因李青山現充地保張夫有曾充縣役可以護庇遂向央允許給每人乾股一分並囑劉俊幫同照料亦許酌分頭錢至十六日劉靠山等在窖開賭卽有朱清河索濟張洛布張洛萬吳洛祥邊洛同王添錫等陸續前往賭博李青山張夫有時常至彼照應連日或係劉靠山自開或係朱清河等開壓不記次數及抽分錢文數目

二十四日起更時分朱清河與王添錫又偕劉靠
山寶益開賭索濟等在場猜壓適饒陽縣知縣劉
遵海帶同丁役下鄉巡查行至北岩村查知有地
窖聚賭之事飭役李顯青等下窖擒出一人誤將
官銜燈籠颺滅續又擒獲朱清河索濟張洛布張
夫有等出窖尙未帶走劉二水劉俊並李青山之
子李春齡等先已逃出趕至李青山家告知李青
山因恐賭犯被獲到官究出包庇情由起意糾人
奪犯囑令劉二水捏稱有賊在街鳴鑼喊拏張瞻
成李棠劉小黑李白珩劉次爲劉水李洛添劉獻

劉蘭盧狗兒李了頭焦純張三劉偶朱青李國大
焦四小焦四李大文王才宋建德李小河李成兒
聽聞各攜器械先後趕至李青山亦同劉俊劉二
水李春齡各持木棍與張瞻成等向北岩村而行
差役李顯青等聽聞人聲喧嚷恐致激成事端回
明劉遵海暫行回至村民王洛懷家坐歇再行設
法誘擒被擒之朱清河等已乘間逃逸李青山等
趕至簷外見並無差役及被擒之人正以無犯可
奪意在游移劉靠山適從地簷內走出聲稱被擒
之人必係差役擒帶進村聳令李青山仍往追奪

將差役捆拏送官誣爲晝夜抄搶方可抵賴李洛
添劉獻劉蘭盧狗兒李了頭焦純張三劉偶朱青
河知係糾約奪犯並非捕賊當各走散劉靠山隨
向李棠等取過火亮下簷找出賭具賍簿燬棄李
青山率領劉俊等並邀允張瞻成等先至王洛懷
家門首王洛懷先已將門扃閉該縣車夫韓得功
在外看車不知被何人棍毆致傷左肩甲李青山
料知差役在內撞門不開經劉靠山隨後趨至越
牆進院開門將李青山劉俊張瞻成李固劉二水
李春齡大焦四王才宋建德放入又囑李棠劉黑

三
小李白珩劉次爲劉水小焦四李大文李小河李
成兒在門外把守大焦四用鞭砸打窗戶劉靠山
劉俊李國王才朱建德擡起院放標木撞開屋門
該縣劉遵海督飭李顯青等持棍向外毆打並用
腳亂踢劉靠山喝令李國執持鐵叉劉俊王才朱
建德劉二水李春齡各持木棍進內亂毆不知何
人將劉遵海頂帽打落致傷額顙右額角並毆傷
差役李顯青右額角左手腕左肘左腳踝右膝
蓋右腳腕李得勲右太陽接連右眼胞左手腕右
腓肌耿振剛右膝蓋蘇明山左腳腕李青山與劉

靠山乘勢一擁進屋主令劉俊等將李顯青等同
王魁義五人揪出院內解帶捆住兩手李青山喝
令拉往村中廟內劉遵海由裏間出向吆喝被李
青山揪住衣領劉靠山幫同推擁出院交給劉俊
揪住髮辮李國架住胎膊欲行王玉上前拉護被
張瞎成用鐵尺毆傷其偏右亦卽揪出其時李青
山等並不知爲官長王洛懷在院央告亦因人多
聲襍俱未聽聞當將劉遵海與王玉等均拉至廟
內致各揪落髮辮一絡李青山等因找無被擒之
人亦與李棠等一同赴廟當有饒陽縣民曹興周

等經過認係縣官囑令李青山速行放回李青山始知錯誤心防後患稱須有人保令無事方允放回並張夫有逃後聞知李青山糾人奪犯折回幫助亦卽進廟向李青山囑勿輕放旋聞饒陽縣營捕官帶領兵役前往方各畏懼將劉遵海同丁役王玉等解放出村劉遵海途遇營捕官役督同折回該廟查拏李青山等業已逃散回縣稟經該管知州蔣兆璠前往勘驗轉稟_臣以案關重大委員會同該縣等嚴拏各犯先後獲解來省委審明確由司解勘_臣提犯覆鞫據各供晰前情不諱詰訊

該犯等堅供祇知係差役拏賭糾衆奪犯並不知有官長以致誤行揪辱實無明知抗拒情事矢口不移案無遁飾查律載官司差人捕獲罪人聚衆中途打奪傷差者絞監候聚衆十人爲首者斬監候爲從各減一等又例載開場引誘賭博經旬累月放頭抽頭者初犯杖一百徒三年賭博不分兵民枷號兩個月杖一百名等語此案李青山於劉靠山開場聚賭包庇分肥經官查拏輒敢起意糾衆奪犯復聽劉靠山聳恿追至王洛懷家拒傷多人並將鄰邑長官肆行揪辱固係犯時不知並非

明知抗拒究屬藐法逞兇該犯聚衆十人以上自應按律問擬李青山合依官司差人捕獲罪人聚衆中途打奪至十人爲首者斬監候律擬斬監候該犯情罪較重請

旨卽行正法劉靠山因開賭被拏經李青山糾衆奪犯輒敢聳令趕至王洛懷家撞門進屋喝令劉俊等持械拒毆復幫同李青山誤行推擁辱官該犯雖未起意糾奪實係毆差爲首劉靠山除開賭抽頭罪止滿徒輕罪不議外應請照官司差人捕獲罪人聚衆中途打奪傷差者絞律擬絞監候惟近來

直省奪犯毆差之案漸多此而不加嚴懲治無以
儆亂民而飭官方劉靠山一犯亦應請

旨卽行處決劉俊張瞻成聽從李青山同往奪犯劉俊
復聽從劉靠山主使毆差辱官張瞻成亦用鐵尺
傷人張夫有係已革皂役始則均分頭錢庇護聚
賭被拏逃走繼因李青山糾人奪犯折回幫助在
廟明知縣官猶復不令放回反向李青山阻止情
節較重若照爲從按律擬流均屬輕縱劉俊張瞻
成張夫有應請發往新疆給官兵爲奴劉俊張夫
有在於配所用重枷號半年以示懲儆李崇劉

小黑李白珩劉次爲劉水僅在門外把守均屬爲
從應於李青山斬罪上減一等各杖一百流三千
里至配所折責安置朱清河索濟張洛布張洛萬
吳洛祥邊洛同王添錫僅止在場聚賭並未隨同
打奪均照賭博不分兵民例枷號兩個月滿口杖
一百折責發落李洛添劉獻劉蘭盧狗兒李了頭
焦純張三劉偶朱清先因捕賊起至後聞李青山
等意在奪犯均各走散均毋庸議王玉等傷俱平
復地窖業已平毀劉俊劉黑小據供親老丁單毋
庸查辦留養逸犯劉二水等分別飭緝獲日另結

失察賭博賭具職名另行飭取咨部議處並供招
咨部謹

奏奉

硃批刑部速議具奏

道光九年十二月十八日

奏爲陷養案內親屬鄰佑人等應覈其離省遠近分
別提審委審以杜捏飾事竊照九年正月十八日
奉

上諭著通諭各督撫督同臬司於秋審時遇有呈請留
養者務當親提犯屬屍親鄰佑人等逐加研訊實係

親老丁單及孀婦獨子方准查辦倘有捏飾卽著據實懲治不准稍涉朦混欽此欽遵辦理在案臣查人犯犯事到官皆係例應懲治而查其有無老親是否獨子分別准其留養原係

聖明法外之仁豈容稍有捏飾伏讀

聖諭周詳仰見

慎重庶獄於施恩之中仍寓杜弊之意自督撫以至地方有司皆當切實稽覈以杜冒濫之弊查向來辦理留養案件皆由州縣訊取供結詳辦今欲杜絕弊端必當遵奉

諭旨提齊犯屬人等來省審訊庶足以昭覈實惟查各州縣離省有遠近之分其離省近者不難提省查訊若離省寫遠之處一概提省審訊其屍親鄰佑人等因難免道途跋涉之苦且例應留養之犯親俱係年老之人道路奔馳觸犯寒暑誠悲其子未出囹圄而其親已填溝壑則子欲養而親不待似非推廣

皇仁之意臣查本年浙江省以秋審留養人犯離省寫遠之處應否一概提省咨請部示奉部議覆距省寫遠府州秋審人犯定例現歸巡道提審則犯屬

人等應一併解道審辦免其解省是向來辦理秋審之巡道卽可就近查辦留養業已奉部議准各省似可循照辦理惟直省幅員遼濶各府州縣離省寫遠之處甚多其多倫廳一處秋審人犯向歸巡道提審留養之犯屬人等自應歸道審辦此外尙有宣化府及張家口獨石口二廳地處邊陲東則永平府遵化州南則大名順德廣平三府距省或千里或八九百里道路云遙往返不易竊思秋審有關罪名出入尙可由巡道提審今辦理秋審之巡道旣可查辦留養則向來雖非查辦秋審之

巡道而所屬寫遠府州遇有留養案件似亦可責成就近查辦各該道自顧考成斷不致扶同捏飾況查向來辦理留養案件僅令州縣取結詳辦今離省遠者責成巡道審辦近者提省審訊已足以昭詳慎臣與署臬司李振翥公同商酌應請嗣後直隸省所屬之宣化大名順德廣平永平五府及多倫諾爾獨石口張家口三廳並遵化州各屬留養案件均歸該管巡道就近提齊屍親犯屬人等訊取供結詳辦其離省較近各府州仍遵

旨由臣督同臬司親提審辦如屍親犯屬人等實有老

病不能就道者卽由該州縣稟請委員前往查訊
取結詳報如此則捏飾之弊可除而犯屬人等亦
可免長途往返之累謹

奏奉

硃批依議刑部知道

道光十年四月初四日

奏爲知縣驗報命案未能究出實情提省審明定議
事竊據平山縣知縣周爾堂驗報民人要自新被
人勒挂身死失去小鞋搭包兇犯無獲等情到
臣當經批飭勒限嚴緝嗣該縣周爾堂辦道公出該

縣代行典史趙秉綱飭差訪得要自新素與民婦
趙安氏之姦羅趙氏有姦係在趙安氏家身死據趙
安氏等供稱要自新先與羅趙氏通姦後被拒絕
復飲醉前往逼姦羅趙氏遂與趙安氏將其推出
要自新又跳牆進院叫門未理卽在門外自縊身
死趙安氏囑婿羅三拉他等將屍移出等語該典
史據情通稟迨周爾堂公回覆訊仍以前情詳報
臣因情節支離駁據臬司飭委子牙河通判鄭琦
會同該縣查訊復據具稟訊得要自新實係續姦
不遂心迷自縊經該司以先後驗訊兩歧供情未

確詳請提省飭委保定府知府張範東督同委員
審明要自新係與羅趙氏通姦拒絕後復向逼姦
被羅趙氏等謀勒致死由司覆審定擬詳請審

奏前來

臣

親加研鞫緣羅趙氏係平山縣民趙連文

之女趙連文老病不起其妻趙安氏與子趙代婆
做賣豆腐營生羅趙氏嫁與靈壽縣羅三拉他爲
妻因夫常外出時回母家居住與已死要自新同
村認識見面不避嘉慶二十五年間不記月日要
自新乘空與羅趙氏調戲成姦後遇羅趙氏回歸
乘隙宣淫並未給與錢物趙連文與趙安氏趙代

婆羅三拉他均不知情道光四年春間趙安氏窺破姦情詈罵禁止羅趙氏亦悔過拒絕六年間羅趙氏同夫羅三拉他搬至趙連文家同居不記日期羅趙氏站立門首適要自新經過聲言欲與續舊該氏告以伊母禁阻伊夫早晚回家恐被知覺囑勿再向纏擾而散嗣要自新借買豆腐爲由猶向羅趙氏用言挑動羅趙氏村斥趙安氏聽聞亦向斥罵並稱以後不許要自新往買豆腐要自新跑走兩次均經鄰人趙連才目覩八年十月十六日夜趙連文病卧南屋裏間趙安氏坐卧打盹羅

趙氏獨自在南屋外間紡花未將屋門關閉三更時分要自新飲醉潛由後牆缺口進院撥開過道後門推門入室向羅趙氏拉衣求姦羅趙氏不允起身將其推出要自新拉住不放羅趙氏情急嚷罵趙安氏驚醒下炕趙代婆亦聽聞開門出與不依趙安氏見要自新酒醉欲俟次日理論囑趙代婆將要自新拉出街上關閉街門並將後門關好各自進屋詎要自新又越牆撥門直闖入室聲言羅趙氏前曾與伊有姦不必再充正經卽撲拉羅趙氏衣襟強欲行姦羅趙氏氣忿用腳踢蹬致將

要自新腎囊蹬傷要自新鬆放衣襟合跌倒地被
石碰傷額顛趙代婆亦聞聲走出要自新益肆撒
賴嚷稱羅趙氏如此可惡定將姦情嚷破使伊夫
聞知將其處死羅趙氏聽而忿極卽騎壓要自新
身上要自新酒醉身軟又已受傷不能掙起羅趙
氏聲言要自新旣欲送伊性命不如將其勒死免
得聲張懇趙安氏趙代婆幫助趙安氏等先尙不
肯因羅趙氏自欲碰死亦卽允從羅趙氏卽令趙
代婆按住要自新兩腿又囑趙安氏找取藤繩套
入要自新項頭要自新將身掙轉側卧混罵並用

兩手往上亂抓羅趙氏將其兩手指攥住以致凝
有血癰趙安氏兩手執提繩頭向上拉勒要自新
卽氣絕殞命因趙安氏手勢一橫一斜向上力拉
以故繩痕未經交口當將屍身擡至東屋藏放十
七日早適羅三拉他由僱主家走回趙安氏捏稱
要自新欲將羅趙氏強姦氣忿商同勒死囑羅三
拉他乘夜幫同移屍假裝路斃羅三拉他不知先
和後拒情由聞言應允待至二更羅三拉他與趙
代婆將屍擡起由後牆缺口送至村外廟前旱溝
撩放並將毡帽戴上鞋隻擲下次日羅三拉他仍

赴僱主家做工趙安氏查見要自新遺有舊藍布
搭包慮恐存留被人看破立即燒燬而要自新之
子要長生因父出未歸找見溝內屍身揭下毡帽
認係父屍時有桑成佩在彼要長生囑其看守回
告伊祖母要王氏等邀同要洛定趙大存柱趙二
存柱前往查看要王氏因見屍身項有繩痕口吐
血沫死甚可疑報經該縣周爾堂勘驗仵作康進
保用水冲洗頭面塵土致將血沫冲去又因項痕
八字不交疑爲勒後弔挂身死即將十指血癢誤
報血墜又未報有血沫並據屍親當場供明失少

小桂搭包等件經周爾堂填格錄供通報一面飭役訪緝嗣周爾堂奉委辦道公出據差役訪聞要自新素與羅趙氏有姦死在趙安氏家內後牆有移屍形跡稟經代行典史趙秉綱傳訊趙安氏始將羅趙氏與要自新通姦拒絕情由先向其婿羅三拉他告知捏爲要自新係向羅趙氏續姦不遂自行縊死等情赴縣首報羅三拉他畏累與羅趙氏趙代婆俱未實供趙秉綱據情通稟周爾堂回署覆審仍未得實情卽以因姦自縊詳報經臣駁飭由司委員會訊趙安氏等各執前供該縣等仍

信爲自縊身死稟經臬司因案情未確檄提犯卷
來省飭委保定府知府張範東等究出實情屢審
供認不諱要自新委係被勒身死詰無另有同謀
加功之人該屍所遺搭包實被趙安氏燒燬其小
桂已據屍親要王氏找出並無失少案無遁飾查
例載和姦本婦悔過拒絕確有證據後被逼姦將
姦夫殺死者照擅殺罪人律減一等杖一百流三
千里又致死姦犯罪本不應擬抵將屍移投坑井
者照地界內有死人不報官司私自掩埋律杖八
十各等語此案羅趙氏先與要自新通姦悔過拒

絕確有趙連才爲證今因要自新復圖續舊夤夜
挾制逼姦該氏被逼氣忿起意商同伊母趙安氏
等將要自新用繩謀勒致死自應按例問擬羅趙
氏合依和姦本婦悔過拒絕確有証據後被逼姦
將姦夫殺死者照擅殺罪人律減一等杖一百流
三千里例應杖一百流三千里係犯姦之婦杖決
流贖趙安氏雖訊無知情縱姦情事惟聽從拉勒
致死復起意移屍趙代婆亦聽按腿移屍均屬不
合趙安氏趙代婆除移屍輕罪不議外均應照餘
人律各擬杖一百趙安氏仍照律收贖趙代婆折

責發落羅三拉他訊非知情客縱亦未商同謀勒其聽從趙安氏移屍係屬爲從合依致死姦犯將屍移投坑井照地界內有死人不報官司私自掩埋律杖八十例爲從減一等應杖七十折責發落作作康進寶將屍傷血癰誤認血墜指爲勒後弔挂身死又因口內血沫被冲未報雖非有心隱匿實屬踈漏應照不應重律擬杖八十折責革役該犯等事犯在道光八年十一月初九日

恩詔以前羅趙氏趙安氏趙代婆羅三拉他均到官在後不准減免康進寶到官在前所得杖罪應予援

免仍革役羅趙氏給與羅三拉他領回聽其去留
無干省釋再平山縣知縣周爾堂驗報要自新勒
挂身死並未指實死由被勒雖於罪名尚無出入
已屬踈忽迨經訪有致死之人又未審出實情輒
信爲自縊詳報尤屬錯誤典史趙秉綱於印官公
出訪聞傳訊未得真情不俟印官覆訊率行稟報
亦屬旨昧均有應得處分相應一併撤任請

旨勅部照例分別議處並將全案供招咨部謹

奏

道光十年四月初七日奉

上諭那彥成奏知縣驗報命案未能究出實情審明定擬一摺此案直隸平山縣知縣周爾堂驗報要自新勒挂身死並未指實死由被勒雖於罪名尙無出入已屬踈忽追訪有致死之人又未審出實情輒信爲自縊詳報尤屬錯誤典史趙秉綱於印官公出訪聞傳訊未得真情不俟印官覆訊率行稟報亦屬冒昧周爾堂趙秉綱均著撤任交部照例分別議處餘著刑部覈議具奏

道光十年七月初四日

奏爲審明定擬事竊照冀州民人朱學武赴都察院

呈控張大白臧文廷調姦伊妻朱趙氏不從將伊妻女殺死燒屍該州不爲究辦等情一案奏奉

諭旨此案著交那彥成督同臬司花杰親提人証卷宗秉公嚴審按律定擬具奏原告朱學武該部照例解往備質欽此並准兵部將原告遞解來直當卽行司飭提卷宗至省經臬司花杰督同保定府知府張範東通判何煥緒題補元城縣知縣劉遵海細心研鞫究出首從各犯審明定擬招解前來臣親提覆訊緣朱學武籍隸冀州有妻趙氏生女美書年甫三歲與張大白臧文廷孫四禿子卽孫邦慶同

莊習見道光九年七月十六日朱學武赴山東朝
城縣販賣草帽朱趙氏因孤寂無伴往向張大白
之母張王氏說明邀其女林書至家伴宿二十七
日林書因患目疾辭不復去二十九日張大白與
臧文廷會遇道及朱趙氏生有姿色欲乘空同往
圖姦臧文廷應允八月初一日黃昏時有孫四禿
子往邀臧文廷弟兄赴鄰村觀劇並有朱丙辰踵
至因值下雨卽進北屋內坐憩嗣朱丙辰同臧二
午因雨未停卽赴別屋就寢臧文廷與孫四禿子
尙在屋內張大白走至後窗喚臧文廷出外孫四

禿子亦跟隨走出張大白卽將欲約臧文廷圖姦
朱趙氏情由向孫四禿子告知邀允同往張大白
因知朱趙氏每夜必赴屋後小廟燒香約俟乘隙
而進遂仍回臧文廷北屋內因小後窗斜對朱趙
氏大門便於窺伺迨雨已住歇果見朱趙氏開門
持香赴廟張大白等潛至其家時住屋中間點有
蠟燈幼女美書已在西間炕上睡熟張大白密囑
臧文廷孫四禿子暫匿西廈俟伊成姦挾制不慮
朱趙氏不與同姦移時朱趙氏回歸閉門進屋一
見張大白卽向查問張大白卽以陪宿之言向告

朱趙氏不依村斥臧文廷與孫四禿子慮恐揚聲
於外出向朱趙氏攔勸朱趙氏聲言臧文廷等俱
係親鄰做此無顏醜事伊若告知各人父母俱恐
大有未便催令作速出去孫四禿子見其執意不
從卽拉張大白等一同走出朱趙氏卽將門戶闔
閉詎張大白淫心未息復以事經父母知曉必受
詈責且難見人不如強將朱趙氏輪姦或因愛臉
隱忍如其不依卽行致死滅口與臧文廷孫四禿
子商允復回至朱趙氏門首張大白先用小刀撥
門不開卽用手撥開大門又用刀撥開屋門一齊

進內朱趙氏已從炕上和衣坐起張大白走近背
後用右手揪其頭髮仰面按倒朱趙氏嚷喊張大
白用左手堵其口鼻臧文廷用左手按其右胎脯
孫四禿子上炕用右膝壓其左胎脯用左手按其
左腿張大白令孫四禿子順取炕頭棉花塞入朱
趙氏口內不能聲喊臧文廷與孫四禿子各用右
手脫卸朱趙氏褲子張大白令孫四禿子按住頭
髮上炕先將朱趙氏姦畢又將頭髮按過臧文廷
與孫四禿子亦替換揪按輪姦鬆手朱趙氏翻身
下炕挖出口內棉花大吼一聲喘氣不止張大白

慮其必不干休復揪至中間鍋臺旁瞥見裏邊放有鐵斧令孫四禿子遞給先砍傷朱趙氏咽喉左朱趙氏用手一摸因孫四禿子站立在旁朱趙氏昏暈手拍孫四禿子背後一下致指上血污沾入孫四禿子藍布小鞋後面朱趙氏當卽側身倒地臧文廷按其兩腿孫四禿子按其胎膊張大白又用斧連砍其腦後三下立時殞命孫四禿子小鞋前面襟袖亦均濺有血跡張大白撩棄鐵斧臧文廷與孫四禿子先行出屋聽聞美書啼哭數聲卽無聲息隨後張大白出向告知已將美書搭死遂

一同走出門外張大白因身有血污回家欲換衣
褲令臧文廷等先回北屋等待臧文廷身衣並未
沾血係四禿子將血染小鞋藏於炕洞維時張大
白至家喚醒伊母張王氏捏稱被雨淋濕欲取衣
褲另換並索火鏟吸烟均未給與遂潛取伊母舊
褲換穿在身走至臧文廷等北屋告以朱趙氏母
女被殺報官必要緝究起意放火燒屍滅跡卽向
臧文廷要過火鏟火絨同臧文廷復至朱趙氏家
找見西屋堆有秫秸柴葉搬至住屋中間堆放屍
上又將換下鞋褲放在一處用火鏟打着火絨吹

燃梁葉登時火起焚燒卽行走出將門虛掩時孫
四禿子因膽怯並未同去初二日黎明時朱學武
之族祖朱起俊出街拾糞瞥見火起喊同王六推
門進內與臧立坦等將火救滅已被燒塌住房屋
頂刨見朱趙氏被燒屍身受有刃傷美書已在炕
被燒成炭通知屍母趙辛氏等看明一面遣子找
向朱學武通信張大白於是日午後前至伊始母
魏張氏家魏張氏因其上身並未著衣神色慌張
再三盤問始認商同臧文廷孫四禿子圖姦朱趙
氏不從將其母女殺死燒屍滅跡已將身穿小鞋

撥入火內燒燬央勿聲張而出魏張氏隨喚張大白之母張王氏至家告知囑其送官免累張王氏回向伊夫張印備述卽找張大白並無踪影至初三日張大白回歸張印等將其斥罵并欲送官張大白另取白布小鞋卽行逃逸先經朱起俊具報該州阮亦昂帶同學習審案之委員候補縣士芳三驗訊因事無證見讐盜難定而屍親朱起俊等又不能確指飭差訪緝論俟找回朱學武覆訊至初五日據該莊鄉地劉漢恭稟報張大白在野莊頭村樹上自縊身死有本處鄉地馮玉城武思文

往告屍父張印不願報官將屍擡回等情復經該
州前往驗訊張印以伊子殺人放火恐干管教不
嚴之咎未將實情供出捏以張大白係私用錢文
被伊斥罵自盡該州因兩案同時並發情有可疑
帶回覆審并訪知臧文廷既係鄰佑匿不在場候
驗恐有別情卽將臧文廷傳案訊據捏供是夜在
韓克讓油坊與王肥子同伴打油又傳韓克讓等
質訊而臧文廷之兄臧瀛辰不知真情因恐審虛
受累往囑韓克讓妄証韓克讓不肯扶捏該州因
臧文廷供詞狡飾督同委員王芳三復向熬審臧

文廷又稱張大白曾向張洛有賒酒約伊與朱丙辰共飲迨朱丙辰去後張大白同伊往向朱趙氏圖姦不從用刀殺死燒屍滅跡血衣藏入家內磨棚飭差查起血衣無獲傳質張洛有並無賒酒之事卽朱丙辰亦未在场同飲其母臧李氏其弟臧二午堅稱是夜臧文廷係在鄰村看戲衆供不符臧文廷亦隨同翻易至張印與張王氏各供均掩藏不露惟魏張氏之供忽認忽翻而血衣總未起獲未能定案該州阮亦昂旋卽奉文辦差公出飭委棗強縣張淑瑗代爲訊詳嗣朱學武回歸查明

並無贗盜情由赴案投審張淑媛錄供分案通報
聲明仍俟該州公同確訊詳辦朱學武以該州既
經審有正兇何以不爲究辦遂赴司呈控批飭訊
解嗣朱學武回州因清理房基有賊可敬之子臧
立謙知其契已燒燬欲佔房西空地檢出遠年白
契塗改四至並捏造合同指稱係伊祖上借給朱
姓祖上地基往向朱學武索還朱學武見係捏造
心疑臧可法等挾嫌欺佔又赴司并臣衙門呈控
批飭據實詳報乃孫四禿子以張大白已故料難
破案旋從炕洞取出血染小褂用水泡洗穿往各

處傭工總未到案本年四月間朱學武因延案日
久一時情急復赴都察院添砌各情呈控奏奉

諭旨咨解來直提集人卷據臬司花杰督同委員保定
府張範東等悉心研究各供先仍不吐實情因思
朱趙氏身係少婦現無深讐積怨之人又無一絲
半粟之失其爲因姦被殺已無疑義惟圖姦之人
若非平素熟習何敢突至其家而死後燒屍顯爲
滅跡起見張大白與臧文廷俱係該氏同村平日
結羣遊蕩斷非安分之徒且張大白自盡之日又
適在於朱趙氏被害之後屍父不願報驗種種情

涉可疑既有魏張氏曾供張大白有圖姦殺害之語而臧文廷雖旋認旋翻急應從此根究因逐一隔別研詰熬審經旬始據張印等將張大白圖姦殺害燒屍滅跡情由供出而臧文廷等聽從輪姦幫同加功仍含茹不吐復稱是夜有孫四禿子與伊同屋聯宿可以爲証密提孫四禿子到案先認同宿屬實詰以所聯之屋與朱趙氏緊在對門當朱趙氏被害放火之時豈無聲響何以毫無聽聞該犯孫四禿子詞窮語澀神色慌張察看其所穿藍布小褂前襟衣袖均微有血跡後身顯有血污

指傷痕飭仵查驗屬實始據該犯供認聽從前住
輪姦幫同下手而臧文廷亦卽供認前情並聽從
燒屍一一實吐其屍夫所控劈開肚腹兩脚剝落
各情訊因痛妻慘殺妄行添砌質之原驗刑仵供
與原驗屍格相符究詰各犯再無同謀加功之人
亦無知情容留之家矢口不移案無遁飾查例載
輪姦良人婦女已成殺死本婦首犯擬斬立決梟
示爲從同姦又幫同下手者擬斬立決又殺一家
非死罪二人擬斬立決梟示酌斷財產一半給被
殺二命之家養贍倘本犯監故財產仍行斷給各

等語此案張大白因朱趙氏夫出獨居商同臧文廷孫四禿子前往圖姦不從輒起意將朱趙氏輪姦已成用斧砍傷斃命又將幼女美書搭死復放火燒屍滅跡實屬淫兇不法該犯輪姦殺死本婦爲首與致死一家二命罪名相等自應從一科斷張大白合依輪姦良人婦女已成殺死本婦首犯擬斬立決梟示例擬斬立決業已畏罪自縊身死仍請戮屍梟示照例斷給財產一半給與朱學武養贍臧文廷孫四禿子聽從同姦又各在場用手揪按卽屬幫同下手亦應按例問擬臧文廷孫四

禿子均依爲從同姦又幫同下手者擬斬立決例
擬斬立決張印現知伊子張大白殺人放火之事
雖例得容隱惟張大白業已自盡尙不據實供明
幾至從犯併逃法網殊屬不合應請照不應重律
擬杖八十張王氏魏張氏隨同狡供亦屬非是姑
念婦女無知請免置議臧立謙於朱學武家慘遭
殺害乘機捏造合同圖佔基地情殊可惡未便僅
照侵佔田宅本律計畝科罪應從重亦照不應重
律擬杖八十鄉地武思文馮玉城地主王淑文明
知張大白自縊不卽報驗亦屬不合各照不應輕

律擬笞四十均飭照例折責發落朱學武控詞雖未盡實俱屬有因應毋庸議餘屬無干概毋庸議被燒房屋飭令估計在於各犯名下追賠再查朱趙氏猝遭強暴守正被戕身雖受法情實抗節相應照例附請

旌表以慰幽魂冀州知州阮亦昂於輪姦致死一家二命放火燒屍重案現經訪有端倪不卽切實窮究卽時定案幾至失出斬決重犯非尋常未能審出實情可比未便僅予照例議處相應請

旨革職候補知縣王芳三係分往該州隨同學書吏強

縣知縣張淑瑗亦止代爲錄供詳報均無承審之
責例無處分請免查叅再查此案詳到臬司衙門
經該司花杰督同保定府等認出血衣審得實情
正兇得不漏網除臬司大員不敢仰邀議叙外惟
保定府知府張範東自到任以來委審案件隨到
隨結案內牽連人証不致拖累實爲克盡厥職此
案之外又有審正徒流死罪各案五起似此認真
公事賢能之員自應據實

奏請鼓勵合無仰懇

天恩將保定府知府張範東

賞加道銜以示激勸至保定府通判何煥緒題補元城縣知縣劉遵海隨同細心研鞫不辭勞瘁逐節推求立破重案亦應量加鼓勵併請

旨將保定府通判何煥緒元城縣知縣劉遵海交部從優議叙並將供招咨部謹

奏

道光十年七月初七日奉

上諭那彥成奏審訊冀州民人朱學武京控張大白等調姦伊妻朱趙氏不從將伊妻女殺死燒屍該州不爲究辦現經究明定擬一摺此案冀州知州阮亦昂

於輪姦致死一家二命放火燒屍重案既經訪有端倪不卽切實窮究定案幾至失出斬決重犯非尋常未能審出實情可比著卽革職示懲臬司花杰督同委員認出血衣審得實情俾正兇不致漏網著交部議叙保定府知府張範東究出此案血衣正兇俾冤獄得伸且據該督奏該員於委審案件隨到隨結此外又有審正徒流死罪五案實屬認真公事著賞加道銜以示鼓勵保定府通判何煥緒題補元城縣知縣劉遵海隨同細心研鞠立破重案俱著交部從優議叙餘著刑部速議具奏

道光十年七月十二日

奏爲糧船水手毆傷運弁現在獲犯研審先將大概

供情恭摺具奏事竊

臣接准漕督

臣朱桂楨咨會

安徽廬州三幫回空糧船水手張麻子等在靜海

縣地方毆傷千總德昌一案經該縣獲犯張麻子

王勤二名因天津府親往查辦已飭該府審辦咨

會查照

臣

查近年糧船水手滋事之案不一而足

若不嚴拏究辦終無以示儆當經嚴飭地方文武

務將逸犯按名查拏期在必獲不可視爲尋常逃

兇具文稟拏了事嚴切剴飭去後旋據天津府知

府陳彬稟稱先後飭據委員靜海縣主簿任元並
漕運督臣委員韜元續獲水手張跑孫大張三莒
四四犯將各犯提府逐加研訊據張麻子供稱伊
係山東鄆城縣人向在安徽廬州三幫第十號糧
船充當水手本年六月十六日糧船回空行至靜
海縣雙塘地方停泊三更時分伊與衆水手在岸
乘涼維時運官帶領丁役上岸查夜因見伊等齊
集一處并點有燈亮吸烟疑係賭博上前查禁伊
因用言頂撞卽被運官喝令丁役將伊杖責釋放
伊被責不甘當邀同船幫拉短絳之張跑轉邀水

手王勤代爲邀人毆打洩忿伊卽先上岸嚷罵因
運官帶同丁役上前擒拏伊卽用木棍毆傷運官
左臂膊被運官將木棍奪住伊堅不放手運官卽
取家人常明所帶腰刀將伊胎膊砍傷常明亦接
過腰刀砍劃傷伊額顙等處隨後王勤糾邀現獲
之水手張跑孫大張三莒四未獲之曹三李六等
一同趨至將運官家人常明等毆扎致傷惟莒四
僅止在場助勢並未幫毆等語質之各犯並受傷
之常明等供詞大畧相同現飭查拏逸犯曹三等
務獲歸案嚴審究辦等情

臣

查此案首從人犯八

名現已拏獲首夥六犯尚有餘犯曹三李六二名
未獲臣批飭該府將現獲各犯研審確情從嚴懲
辦一面嚴緝逸犯曹三等務獲究報謹

奏奉

硃批未獲二犯務要嚴拏歸案究辦

道光十年十二月初一日

奏爲糧船水手毆傷運弁審明定擬事竊照安徽廬
州三幫回空糧船水手張麻子等在靜海縣雙塘
地方毆傷押空千總德昌並丁役常明等一案據
靜海縣張孔道並該縣主簿任元等先後拏獲張

麻子等六犯由天津府訊供稟報臣當卽具摺奏
聞欽奉

硃批未獲二犯務要嚴拏歸案究辦欽此遵卽飭府督
率委員上緊嚴拏去後無如逸犯曹三李六遠颺
無踪驟難獲案所有已獲之首從各犯六名未便
久羈自應先行擬結飭據天津府知府陳彬審明
擬解經前臬司花杰因情罪未符駁委保定府知
府張範東會同天津府陳彬審辦茲據該府等覈
審明確由司審解前來正在提審間據清苑縣詳
報案內從犯張跑於十一月初九日在監病故驗

明填格訊據刑禁人等並無凌虐情弊臣隨親提
張麻子等逐加研訊緣張麻子籍隸山東鄆城縣
向在安徽廬州三幫糧船充當水手與其表姪王
勤並同幫拉緯之張跑孫大張三莒四及未獲之
曹三李六均屬交好道光十年六月十六日晚糧
船回空行抵靜海縣雙塘地方停泊三更時分張
麻子與各水手在岸乘涼點燈吸咽該幫押空千
總德昌見其聚集一處疑爲賭博帶領丁役王珍
常明李德上岸查禁衆水手當卽避散張麻子落
後站立德昌向其究問因張麻子回話聲高斥其

頂撞卽令王珍等杖責釋放張麻子心疑王珍等
慫恿德昌巡查致伊無故被責心懷不甘回船攜
取木棍另身欲找王珍等不依並恐被獲再毆當
向張顯告知囑其轉告伊妻姪王勤邀人幫護張
麻子卽先上岸囑罵德昌尙未回船當與王珍等
上前提拏張麻子情急用棍向王珍等毆打致誤
毆德昌左臂膊德昌接住木棍扭奪致截傷張麻
子右胳膊張麻子不肯鬆手德昌順拔常明身帶
腰刀砍傷張麻子左胳膊張麻子仍不鬆手常明
恐伊主受傷情急救護卽向德昌手內接過腰刀

砍割傷張麻子額顱右腮腴右胎膊並左手大指
骨折張麻子釋手倒地時王勤已邀張跑孫大張
三苗四曹三李六各執木柴惟苗四一人徒手同
來幫護王吟等瞥見亦卽上前捉拏王勤用木棍
毆傷李德左腿張跑毆傷常明左胎膊孫大毆傷
常明右後肋張三毆傷常明左手腕左手背李六
毆傷常明左右後肋曹三奪獲常明腰刀砍割傷
常明左右腿左後肋卽同李六將常明捆縛苗四
在場助勢並未幫毆旋各走散卽經靜海縣張孔
道訪聞並據德昌遣人呈報會營驗訊拏獲張麻

子王勤稟經天津府陳彬馳往該縣查辦續獲張
跑孫大張三苗四同首犯張麻子等解府訊取大
概供詞稟經臣先行具

奏茲查逸犯曹三李六遠颺無獲據該府將現犯審
擬解經前臬司花杰以情罪未符駁委保定府知
府張範東會審擬議由司覈審詳解前來適案內
從犯張跑在清苑縣監病故據該縣王仲槐驗明
詳報臣隨親提研訊各供前情不諱案無遁飾臣
查近年糧船水手滋事之案頗多此輩悉係無賴
一有爭鬪動輒聚衆其情甚屬可惡自應隨時懲

治以儆刁頑惟該犯等果係有心傷害本官或不
服拘拏抗違逞兇則罪干重辟法無可寬今審明
張麻子因與同幫水手在岸乘涼聚談吸烟尙非
聚集爲匪迨運弁德昌進前查問以該犯回言頂
撞飭令丁役責懲該犯卽俯首服責亦非不服拘
管嗣該犯疑係丁役愆戾被責欲與王畛等不依
囑其表姪王勤邀人幫護該犯先攜棍尋向王畛
等毆打不防誤傷運弁德昌左臂膊礙其情節實
係邂逅干犯委非有心逞兇例內並無水手毆傷
運弁治罪專條惟水手本受運弁管束卽與部民

無異張麻子一犯應比照軍民人等毆傷本管官如係邂逅干犯照律問擬流徒例部民毆本屬府州縣傷者杖一百流二千里律惟情節較重且囑王勤邀人幫護其逞兇恃強之心已可概見現當整飭清務嚴禁滋事之際仍請從重改發新疆給官兵爲奴以昭炯戒雖據供親老丁單不准留養王勤爲張麻子表姪聽囑邀人幫護聚集六七十之多致將本管官家丁李德常明毆受多傷雖未毆及運弁但其糾人幫護之心卽屬有意滋事且當運官在場罔知畏懼其情亦重未便因其尙未

毆官稍爲輕縱王勤應比照部民毆本屬府州縣
者杖一百流三千里律擬杖一百流三千里張跑
孫大張三聽從王勤糾毆各用木棍將本管官家
丁常明毆傷若僅照尋常鬪毆本律問擬亦不足
以示懲張跑孫大張三均請於王勤流罪上減一
等各擬杖一百徒三年張跑已在監病故應毋庸
議苗四聽糾在場僅止助勢並未下手傷人應照
不應重律擬杖八十加枷號一個月押塞千總德
昌於糧船水手本有管束之責其因張麻子點燈
聚處疑賭查禁向斥責懲尙屬爲公迨被張麻子

毆傷情急抵禦用刀嚇砍亦無不合應與救主格
傷之常明及並無愆愆之王畛等均免置議逸犯
曹三李六仍飭嚴緝獲日另結供招圖結咨部並
咨會漕運督臣謹

奏奉

硃批刑部議奏

那文毅公二任直隸總督奏議

卷七十

先

那文毅公二任直隸總督奏議卷七十